

卷一

唐書列傳卷第一百四十七

劉昫等修

聞人詮校刻沈桐同校

南蠻

西南蠻

林邑

婆利

盤盤

真臘

陀洹

訶陵

墮和羅

墮婆登

東謝蠻

西趙蠻

特柯蠻

南平獠

東女國

南詔蠻

驃國

林邑國漢日南象林之地在交州南千餘里其國延袤數千里北與
驩州接地氣又溫不識冰雪常多霧雨其王所居城立木為柵王著
白氎古貝斜絡膊繞腰上加真珠金鎖以為瓔珞卷髮而戴花夫人
服朝霞古貝以為短裙首戴金花身飾以金鎖真珠瓔珞王之侍衛
有兵五千人能用弩及楛以藤為甲以竹為弓乘象而戰王出則列

象平頭馬四百匹分爲前後其人奉髮色黑俗皆徒跣得麝香以塗身一日之中再塗再洗拜謁皆合掌頓顙嫁娶之法得取同姓俗有文字尤信佛法人多出家父母死子則剔髮而哭以棺盛屍積柴燻柩收其灰藏於金瓶送之水中俗以二月爲歲首稻歲再熟自此以南草木冬榮四時皆食生菜以檳榔汁爲酒有結遼鳥能解人語武德六年其王觀志遣使來朝八年又遣使獻方物高祖爲設九部樂以宴效賜其王及錦綵貞觀初遣使貢馴犀四年其王范頭黎遣使獻少球大如鷄卵圓白皎潔光照數尺狀如水精正午向日以艾蒸之即火燃五年又獻五色鸚鵡太宗異之詔太子右庶子李百藥爲之賦又獻白鸚鵡精識辯慧善於應答太宗憫之並付其使令放還於林藪自此朝貢不絕頭黎死子范鎮龍代立太宗崩詔於陵所刊石圖頭黎之形列於玄闕之前十九年鎮龍爲其臣摩訶漫多伽留所殺其宗族並誅夷范氏遂絕國人乃立頭黎之女婿婆羅門爲王後大臣及國人感思舊主乃廢婆羅門而立頭黎之嫡女爲王自林邑

已南皆卷髮黑身通號爲崑崙

婆利國在林邑東南海中洲上其地延袤數千里自交州南渡海經林邑扶南赤土册數國乃至焉其人皆黑色穿耳附璫王姓刹利耶伽名護略那婆世有其位王戴花形如皮弁裝以真珠瓔珞身坐金牀侍女有金花寶鏤之飾或持白拂孔雀扇行則駕象鳴金擊鼓吹蠶爲樂男子皆奉髮被古貝布橫幅以繞腰風氣暑熱恒如中國之盛夏穀一歲再熟有古貝草緝其花以作布罽者名古貝細者名白鬘貞觀四年其王遣使隨林邑使獻方物

盤盤國在林邑西南海曲中北與林邑隔小海自交州舡行四十日乃至其國與狼牙修國爲隣人皆學婆羅門書甚敬佛法貞觀九年遣使來朝貢方物

真臘國在林邑西北本扶南之屬國崑崙之類在京師南二萬七百里北至愛州六十日行其王姓刹利氏有大城三十餘所王都伊奢那城風俗被服與林邑同地饒瘴癘毒海中大魚有時半出望之如

山每五六月中毒風氣流行即以牛豕祠之不者則五穀不登其俗
東向開戶以東爲上有戰象五千頭尤好者飼以飯肉與隣國戰則
象隊在前於背上以木作樓上有四人皆持弓箭國尚佛道及天神
爲大佛道次之武德六年遣使貢方物貞觀二年又與林邑國俱來
朝獻太宗嘉其陸海疲勞錫賚甚厚南方人謂真臘國爲吉蔑國自
神龍已後真臘分爲二半以南近海多陂澤處謂之水真臘半以北
多山阜謂之陸真臘亦謂之文單國高宗則天玄宗朝並遣使朝貢
水真臘國其境東西南北約員八百里東至奔陀浪洲西至墮羅鉢
底國南至小海北即陸真臘其王所居城號婆羅提拔國之東界有
小城皆謂之國其國多象元和八年遣李摩那等來朝
墮洹國在林邑西南大海中東南與墮和羅接去交趾三月餘日行
賓服於墮和羅其王姓察失利字婆未婆那土無蚕桑以白蠶朝霞
布爲衣俗皆樓居謂之于欄貞觀十八年遣使來朝二十一年又遣
使獻白蠶及婆律膏仍請馬及銅鍾詔並給之

訶陵國在南方海中洲上居東與婆利西與墮婆登北與真臘接
臨大海豎木爲城作大屋重閣以椽欄皮覆之王坐其中采用象牙
爲牀食不用匙筋以手而撮亦有文字頗識星曆俗以椰樹花爲酒
其樹生花長三尺餘大如人脰割之取汁以成酒味甘飲之亦醉貞
觀十四年遣使來朝大曆三年四月皆遣使朝貢元和十年遣使獻
僧祇僮五人鸚鵡頻伽鳥并異種名寶以其使李訶內爲果教訶內
請迴授其弟詔褒而從之十三年遣使進僧祇女二人鸚鵡玳瑁及
犀等

墮和羅國南與盤盤北與迦羅舍佛東與真臘接西隣大海去廣州
五月日行貞觀十二年其王遣使貢方物二十三年又遣使獻象牙
火珠請賜好馬詔許之

墮婆登國在林邑南海行二月東與訶陵西與迷黎車接北界大海
風俗與訶陵略同其國種稻每月一熟亦有文字書之於貝多葉其
死者口實以金又以金釧貫於四支然後加以婆律膏及龍腦等香

積薪以燔之貞觀二十一年其王遣使獻古貝象牙白檀太宗覽書報之并賜以雜物

東謝蠻其地在黔州之西數百里南接守宮獠西連夷子北至蠻土宜五穀不以牛耕但爲畝田每歲易俗無文字刻木爲契散在山洞間依樹爲巢而居汲流以飲皆自營生業無賦稅之事謁見貴人皆執鞭而拜有功勞者以牛馬銅鼓賞之有犯罪者小事杖罰之大事殺之盜物倍還其贓婚姻之禮以牛酒爲聘女歸夫家皆毋自送之女夫慙逃避經旬乃出讌聚則擊銅鼓吹大角歌舞以爲樂好帶刀劍未嘗捨離丈夫衣服有衫襖大口袴以縹緗及布爲之右肩上斜束皮帶裝以螺蚌虎豹猿狖及犬羊之皮以爲飾外飾坐皆蹲踞男女椎髻以緋束之後垂向下其首領謝元深既世爲酋長其部落皆尊畏之謝氏一族法不育女自云高姓不可下嫁故也貞觀三年元深入朝冠烏熊皮履若今之髦頭以金銀絡額身披毛毳爲皮行勝而者履中書侍郎顏師古奏言昔周武王時天下太平遠國歸款回

史乃書其事爲王會篇今萬國來朝至如此輩章服實可圖寫今請撰爲王會圖從之以其地爲應州仍拜元深爲刺史領黔州都督府又有南謝首領謝強與西謝隣共元深俱來朝見爲南壽州刺史後改爲莊州貞元十三年正月西南蕃大酋長正議大夫檢校蠻州長史繼襲蠻州刺史資陽郡開國公賜紫金魚袋宋鼎左右大首領朝散大夫前檢校邛州刺史賜紫金魚袋謝汕左右大首領繼襲攝蠻州巴江縣令賜紫金魚袋宋萬傳界首子弟大首領朝散大夫祥州錄事參軍諱文經黔中經畧招討觀察使王礎奏前件刺史建中三年一度朝貢自後更不許隨例入朝今年懇訴稱州接祥柯同被聲教獨此排擯竊自慙耻謹遣隨祥柯等朝賀伏乞特賜優諭無同祥柯刺史授官其祥柯兩州戶口殷盛人力強大隣側諸蕃悉皆敬憚請比兩州每三年一度朝貢仍依祥柯輪環差定并以才幹位望爲衆推者充勅旨曰宋鼎等已改官訖餘依舊

西趙蠻在東謝之南其界東至夷子西至昆明南至西洱河山洞阻

深莫知道里南北十八日行東西二十三日行其風俗物產與東謝同首領趙氏世爲酋長有戶萬餘貞觀三年遣使入朝二十一年以其地置明州以首領趙磨爲刺史其地北去兗州一百五十里東至辰州二千四百里南至交州一千五百里西至昆明九百里無城壁散爲部落而居土氣鬱熱多霖雨稻粟再熟無徭役唯征戰之時乃相屯聚刻木爲契其法劫盜者二倍還贓殺人者出牛馬三十頭乃得贖死以納死家風俗物產畧與東謝同其首領謝龍羽大業末據其地勝兵數萬人武德三年遣使朝貢授龍羽牂州刺史封夜郎郡公貞觀四年十二月遣使朝貢開元十年閏五月大酋長謝元齊死詔立其嫡孫嘉甄襲其官封二十五年大酋長趙君道來朝且獻方物大曆中貞元初數遣使朝貢七年二月授其酋長趙主俗官以其歲初朝貢不絕棄之也自七年至十八年凡五遣使來元和三年五月勅自今已後委黔南觀察使差本道軍將充押領牂牁昆明等使四年正月

遣使來朝是月遣中使魏德和領其使并賚國信物降璽書賜其王焉七年九年十一年凡三遣使來其年十二月又遣使來賀正長慶中亦朝貢不絕寶曆元年十二月遣使謝良震來朝大和五年至會昌二年凡七遣使來

南平獠者東與智州南與渝州西與涪州接部落四千餘戶土氣多瘴癘山有毒草及沙虱蝮蛇人並樓居登梯而上號爲干欄男子左衽露髮徒跣婦人橫布兩幅穿中而貫其首名爲通裙其人美髮爲髻鬢垂於後以竹筒如筆長三四寸斜貫其耳貴者亦有珠璫土多女少男爲婚之法女氏必先貨求男族貧人無以嫁女多賣與富人爲婢俗皆婦人執役其王姓朱氏號爲劔荔王遣使內附以其地隸于渝州

東女國西羗之別種以西海中復有女國故稱東女焉俗以女爲王東與茂州党項接東南與雅州接界隔羅女蠻及白狼夷其境東西九日行南北二十日行有大小八十餘城其王所居名康延川中有

弱水南流用牛皮爲船以渡戶四萬餘衆勝兵萬餘人散在山谷間
女王號爲賓就有女官曰高霸平議國事在外官僚並男夫爲之其
王侍女數百人五日一聽政女王若死國中多歛金錢動至數萬更
於王族求令女二人而立之大者爲王其次爲小王若大王死即小
王嗣立或姑死而婦繼無有篡奪其所居皆起重屋王至九層國
人至六層其王服青毛綾裙下領衫上披青袍其袖委地冬則羔裘
飾以紋錦爲小鬟髮飾之以金耳垂璫足履鞢鞞俗重婦人而輕丈
夫文字同於天竺以十一月爲正其俗每至十月令巫者齋楮詣山
中散糟麥於空大吡呼鳥俄而有鳥如鷄飛入巫者之懷因剖腹而
視之每有一穀來歲必登若有霜雪必多災異其俗信之名爲鳥卜
其居喪服飾不改爲父母則三年不櫛沐貴人死者或剝其皮而藏
之內骨於瓶中糝以金屑而埋之國王將葬其大臣親屬殉死者數
十人隋大業中蜀王秀遣使招之拒而不受武德中女王湯滂氏始
遣使貢方物高祖厚資而遣之還至隴右會突厥入寇被掠於虜庭

及頡利平其使復來入朝太宗送令反國并降璽書慰撫之垂拱二
年其王欽臂遣大臣湯劔左來朝仍請官號則天冊拜欽臂爲左王
鈐衛員外將軍仍以瑞錦製蕃服以賜之天授三年其王俄琰兒來
朝萬歲通天元年遣使來朝開元二十九年十二月其王趙曳夫遣
子獻方物天寶元年命有司宴於曲江令宰臣已下同宴又封曳夫
爲歸昌王授左金吾衛大將軍賜其子帛八十四匹放還後復以男子
爲王貞元九年七月其王湯立悉與哥隣國王董董卧庭白狗國王羅
施忽逋租國王弟鄧吉知南水國王姪薛尚悉曩弱水國王董辟和
悉董國王湯息贊清遠國王蘇唐磨咄霸國王董藐蓬各率其種落
詣劔南西川內附其哥隣國等皆散居山川弱水王即國初女國之
弱水部落其悉董國在弱水西故亦謂之弱水西悉董王舊皆分隸
邊郡祖父例授將軍中郎果毅等官自中原多故皆爲吐蕃所役屬
其部落大者不過三二千戶各置縣令十數人理之土有絲絮歲輸
於吐蕃至是悉與之同盟相率獻款兼賚天寶中國家所賜官誥共

三十九通以進西川節度使常臯處其衆於維霸保等州給以種糧耕牛成樂生業立悉等數國王自來朝召見於麟德殿授立悉銀青光祿大夫歸化州刺史鄧吉知試太府少卿兼丹州長史薛尚悉曩試少府少監兼霸州長史董卧庭行至綿州卒贈武德州刺史命其子利囉爲寶寧都督府長史襲哥隣王立悉妹乞悉漫頗有才智從其兄來朝封和義郡夫人其大首領董卧卿等皆授以官俄又授女國王兄湯厥銀青光祿大夫試太府卿清遠王弟蘇歷顛銀青光祿大夫試衛尉卿南國王薛莫庭及湯息替董蓬藐女國唱後湯佛庭美王鉢南郎唐並授銀青光祿大夫試太僕卿其年西山松州先生等二萬餘戶相繼內附其粘信部落主董夢葱龍諾部落主董辟忽皆授試衛尉卿立悉等並赴明年元會訖錫以金帛各遣還尋詔加常臯統押近界羌蠻及西山八國使其部落代襲刺史等官然亦潛通吐蕃故謂之兩面羌

南詔蠻本烏蠻之別種也姓蒙氏蠻謂王爲詔自言克罕之後代居蒙舍州爲渠帥在漢永昌故郡東姚州之西其先渠帥有六自號六詔兵力相埒各有君長無統帥蜀時爲諸葛亮所征皆臣服之國初有蒙舍龍生迦獨麗迦獨生細奴邏高宗時來朝細奴邏主邏盛武后時來朝其妻方娘邏盛次姚州聞妻子曰吾且有子死於唐地足矣子名曰盛邏皮死子皮邏閣立二十六年詔授特進封越國公子盛邏皮立盛邏皮死子皮邏閣立二十六年詔授特進封越國公賜名曰歸義其後破洱河蠻以功策授雲南王歸義漸強盛餘五詔浸弱先是劍南節度使王昱受歸義賂奏六詔合爲一詔歸義既併五詔服群蠻破吐蕃之衆兵日以驕大每入覲朝廷亦加禮異二十七年徙居大和城天寶四載歸義遣孫鳳迦異來朝授鴻臚卿歸國恩賜甚厚歸義意望亦高時劍南節度使章仇兼瓊遣使至雲南與歸義言語不相得歸義常嚙之七年歸義卒詔立子閣羅鳳襲雲南王無何鮮于仲通爲劍南節度使張虔咤爲雲南太守仲通徧急寡謀虔阨矯詐待之不以禮舊事南詔常與其妻子謁見都督虔阨皆

私之有所徵求閣羅鳳多不應處隨遣人罵辱之仍密奏其罪惡閣羅鳳忿怨因發兵反攻圍虔陀殺之時天寶九年也明年仲通率兵出戎雋州閣羅鳳遣使謝罪仍與雲南錄事參軍姜如芝俱來請還其所虜掠且言吐蕃大兵壓境若不許當歸命吐蕃雲南之地非唐所有也仲通不許因其使進軍逼大和城為南詔所敗自是閣羅鳳北臣吐蕃吐蕃令閣羅鳳為蒼普鍾號曰東帝給以金印蠻謂弟為鍾時天寶十一年也十二年劔南節度使楊國忠執國政仍奏徵天下兵俾留後侍御史李宓將十餘萬輦餉者在外涉海瘴死者相屬於路天下始騷然苦之宓復敗於大和城北死者十八九會安祿山反閣羅鳳乘釁攻陷雋州及會同軍西復尋傳蠻大曆十四年閣羅鳳子迦異先閣羅鳳死立迦異子是為異牟尋頗知書有才智善撫其眾吐蕃後賦南蠻重數又奪諸蠻險地立城堡歲徵兵以助鎮防牟尋益厭苦之有鄭回者本相州人天寶中舉明經授雋州西瀘縣令雋州陷為所虜閣羅鳳以回有儒學更名曰蠻利甚愛重之命教

鳳迦異及異牟尋立又令教其子尋夢湊回又為蠻師凡授學雖牟尋夢湊回得善撻故牟尋以下皆嚴憚之蠻謂相為清平官凡置六人牟尋以回為清平官事皆咨之秉政用事餘清平官五人事回卑謹或有過回輒撻之回嘗言於牟尋曰自昔南詔嘗款附中國中國尚禮義以惠養為務無所求取今棄蕃歸唐無遠戍之勞重稅之困利莫大焉牟尋善其言謀內附者十餘年矣會劔南西川節度使常臯招撫諸蠻苴烏星虜望等歸化徵聞牟尋之意因令蠻寓書於牟尋且招懷之時貞元四年也七年又遣間使持書喻之道出磨此蠻其魁王潛告吐蕃使至雲南吐蕃已知之令詰牟尋牟尋懼因給吐蕃曰唐使本蠻也常臯許其求歸無他謀遂執送吐蕃吐蕃益疑之多召南詔大臣之子為質牟尋愈怨九年四月牟尋乃與酋長定計遣使趙莫羅眉由兩川楊大和堅由黔中或由安南使凡三輩致書於常臯各賚生金丹砂為贄三分前臯所與牟尋書各持其一為信歲中三使皆至京師且曰牟尋請歸大國求為藩國所獻生金以喻回北

之意如金也丹砂示其赤心耳上嘉之乃賜牟尋詔書因命肅臯遣使以觀其情臯遂命巡官崔佐時至牟尋所都陽苴咩城南去太和城十餘里東北至成都二千四百里東至安南如至成都通水陸行是時也吐蕃使數百人先佐時在南詔牟尋悉召諸種落與議歸化或未畢至未敢公言密令佐時稱祥物使衣以祥物服而入佐時不肯曰我大唐使安得服小夷之服牟尋不得已乃夜迎佐時設位陳燈燭佐時乃大宣詔書牟尋恐吐蕃知顧左右無色而業已歸唐又矣歔歔流涕皆俯伏受命其明年正月異牟尋使其子閣勸及清平官等與佐時盟於點蒼山神祠盟書一藏於神室一沉於西洱河一置祖廟一以進天子閣勸即尋夢奏也鄭回見佐時多所指導故佐時探得其情乃請牟尋斬吐蕃使數人以示歸唐又得其吐蕃所與金印牟尋遣佐時歸仍刻金契以獻閣勸賦詩以餞之牟尋乃去吐蕃所立帝號私於佐時請復南詔舊名佐時與盟訖留旬有六日而歸初吐蕃因爭北庭與迴鶻大戰死傷頗衆乃徵兵於牟尋滇

萬人牟尋既定計歸我欲因徵兵以襲之乃示寡弱謂吐蕃曰蠻雷素少僅可發三千人吐蕃少之請益至五千乃許牟尋遽遣兵五千人戍吐蕃乃自將數萬踵其後晝夜兼行乘其無備大破吐蕃於神川遂斷鐵橋遣使告捷且請肅臯使閱其所虜獲及城堡以取信焉時肅臯上言牟尋收鐵橋已未城壘一十六擒其王五人降其衆十餘萬以祠部郎中兼御史中丞袁滋持節冊南詔仍賜牟尋印鑄用黃金以銀為窠文曰貞元冊南詔印先是肅臯奏南詔前遣清平官尹仇寬獻所受吐蕃印五二用黃金今賜請以黃金從蠻夷所重傳示無窮從臯之請也十年八月遣使蒙湊羅棟及尹仇寬來獻鐸樂浪人劔及吐蕃印八紐湊羅棟牟尋之弟也錫賚甚厚以尹仇寬為檢校左散騎常侍餘各授官有差俄又封尹仇寬為高溪郡王十一年三月遣清平官尹輔首隨袁滋來朝又得先沒蕃將衛景昇韓演等并南詔所獲吐蕃將帥俘馘百人至京師湊羅棟歸國在道而卒贈右散騎常侍授尹輔首檢校太子詹事兼御史中丞餘亦差次授

官又降勅書賜異牟尋及子閣勸清平官鄭回尹仇寬等各一書書
左列中書三官宣奉行復舊制也九月異牟尋遣使獻馬六十四匹十
二年高皇於雅州會野路招收得投降蠻首領高萬唐等六十九人
戶約七千兼萬唐等先授吐蕃金字告身五十片十四年異牟尋遣
酋望大將軍王丘各等賀正兼獻方物十九年正月旦上御含元殿
受南詔朝賀以其使楊鎮龍武爲試太僕少卿授黎州廓清道蠻首
領襲泰化郡王劉志寧試太常卿二十年南詔遣使朝貢元和二年
八月遣使鄧傍傳來朝授試殿中監三年十二月以異牟尋卒廢朝
三日四年正月以太常少卿武少儀克弔祭使仍冊牟尋之子驃信
宣蒙閣勅爲南詔仍命鑄元和冊南詔印七年十月皆遣使朝貢十
一年五月以龍蒙盛卒廢朝三日遣使來請冊立其君長以少府少
監李銑克冊立弔祭使左贊善大夫許堯佐副之十二年至十五年
比年遣使來朝或年內二三至者寶曆二年大和元年亦遣使來三
年杜元穎鎮西川以文儒自高不練戎事南蠻乘我無備大舉諸部

入寇牧守屢陳亦不之信十一月蜀川出軍與戰不利陷我邛州
成都府入梓州西郭驅劫王帛子女而去上聞之大怒再貶元穎爲
濬州司馬明年正月其王蒙嗟顛以表自陳請罪兼䟽元穎過失國
家方事桑維翰釋其罪復遣使來朝五年八年亦遣使來貢方物開
成四年五年會昌二年皆遣使來朝
驃國在永昌故郡南二千餘里去上都一萬四千里其國境東西三
千里南北三千五百里東隣真臘國西接東天竺國南盡滇海北通
南詔此樂城界東北拒陽苴咩城六千八百里往來通聘迦羅婆提
等二十國役屬者道林王等九城食境土者羅君潛等三百九十部
落其王姓困沒長名摩羅惹其國相名摩訶思那其王近適則昇以
金繩牀遠適則乘象嬪妹其衆常數百人其羅城構以磚甃周百
六十里壕岸亦構塼相傳本是舍利佛城城內有居人數萬家佛寺
百餘區其堂宇皆錯以金銀塗以丹彩地以紫鑛覆以錦罽其俗好
生惡殺其土宜菽粟稻梁無麻麥其理無刑名桎梏之具犯罪者以

竹五十本東之復犯者撻其背數止五輕者止三殺人者戮之男女
七歲則落髮止寺舍依桑門至二十不悟佛理乃復長髮為居人其
衣服悉以白氎為朝霞繞腰而已不衣繒帛云出於蠶為其傷生故
也君臣父子長幼有序華言謂之黠自謂突羅成閻婆人謂之徒里
掘古未嘗通中國貞元中其王聞南詔異牟尋歸附心慕之八年乃
遣其弟悉利移因南詔重譯來朝又獻其國樂凡十曲與樂工三十
五人俱樂曲皆演釋氏經論之詞意尋以悉利移為試太僕卿
史臣曰禹畫九州周分六服斷長補短止方七千國賦之所均王教
之所備此謂華夏者也以圓蓋方輿之廣廣谷大川之多民生其間
胡可勝道此謂蕃國者也西南之蠻夷不少矣雖言語不通嗜欲不
同亦能候律瞻風遠脩職貢但患已之不德不患人之不來何以驗
之貞觀開元之盛來朝者多也

贊曰五方異氣所稟不同維南極海日蠻與戎惡我則叛好我則通
不可不德便其瞻風

唐書列傳卷第一百四十七

唐書列傳卷第一百四十八

劉昫等修
聞人詮校刻沈桐同校

西戎

泥婆羅

党項羌

高昌

吐谷渾

焉耆

龜茲

踈勒

于闐

天竺

罽賓

康國

波斯

拂菻

大食

泥婆羅國在吐蕃西其俗剪髮與眉齊穿耳揷以竹筒牛角綴至肩者以為姣麗食用手無匕箸其器皆銅多商賈少田作以銅為錢面文為人背文為馬牛不穿孔衣服以一幅布蔽身日數盥浴以板為屋壁皆雕畫俗重博戲好吹豳擊鼓頗解推測盈虛兼通曆術事五天神鑿石為像每日清水浴神烹羊而祭其王那陵提婆身著真珠

玻璃車渠珊瑚琥珀纓絡耳垂金鈎玉璫佩寶裝伏突坐獅子牀其
堂內散花香大臣及諸左右並坐於地持兵數百列侍其側宮中有
七層之樓覆以銅瓦欄檻楹楹皆飾珠寶樓之四角各懸銅槽下有
金龍激水上樓注於槽中從龍口而出狀若飛泉那陵提婆之父為
其叔父所篡那陵提婆逃難於外吐蕃因而納焉克復其位遂羈屬
吐蕃貞觀中衛尉丞李義表往使天竺塗經其國那陵提婆見之大
喜與義表同出觀阿耨婆娑池周迴二十餘步水恒沸雖流潦暴集
樂石焦金未嘗增減以物投之即生烟焰懸釜而炊須臾而熟其後
王玄策為天竺所掠泥婆羅發騎與吐蕃共破天竺有功永徽二年
其王尸利那連陀羅叉遣使朝貢

党項羗在古折支之地漢西羗之別種也魏晉之後西羗微弱或臣
中國或竄山野自周氏滅宕昌鄧至之後党項始強其界東至松州
西接葉護南雜春桑迷桑等羗北連吐谷渾虜山谷間亘三千里其
種每姓別自為部落一姓之中復分為小部落大者萬餘騎小者數

千騎不相統一有細封氏費聽氏往利氏頗超氏野辭氏房當氏米
擒氏拓拔氏最為強族俗皆土著居有棟宇其屋織犛牛尾及羊毛
覆之每年一易俗尚武無法令賦役其人多壽年一百五十六歲不
事產業好為盜竊互相凌劫尤重復讐言若讐人未得必蓬頭垢面跣
足蔬食要斬讐人而後復常男女並衣裘褐仍披大氍畜犛牛馬驢
羊以供其食不知稼穡土無五穀氣候多風寒五月草始生八月霜
雪降求大麥於他界醞以為酒妻其庶母及伯叔母嫂子弟之婦淫
穢烝褻諸夷中最高為甚然不婚同姓老死者以為盡天年親戚不哭
少死者則云天枉乃悲哭之死則焚屍名為火葬無文字但候草木
以記歲時三年一相聚殺牛羊以祭天自周及隋或叛或朝常為邊
患貞觀三年南會州都督鄭元璫遣使招諭其酋長細封步賴舉部
內附太宗降璽書慰撫之步賴因來朝宴賜甚厚列其地為軌州拜
步賴為刺史仍請率所部討吐谷渾其後諸姓酋長相次率部落皆
來內屬請同編戶太宗厚加撫慰列其地為岢峽奉巖遠四州各拜其

首領爲刺史有羗酋拓拔赤辭者初臣屬吐谷渾甚爲渾主伏允所
暱與之結婚及貞觀初諸羗歸附而赤辭不至李靖之擊吐谷渾赤
辭屯狼道坡以抗官軍廓州刺史乂且洛生遣使諭以禍福赤辭曰
我被渾主親戚之恩腹心相寄生死不貳焉知其他汝可速去無令
污我刀也洛生知其不悟於是率輕騎襲之擊破赤辭於肅遠山斬
首數百級虜雜畜六千而還太宗又令岷州都督李道彥說諭之赤
辭從子思頭密送誠款其黨拓拔細豆又以所部來降赤辭見其宗
黨離始有歸化之意後岷州都督劉師立復遣人招誘於是與思頭
並率衆內屬拜赤辭爲西戎州都督賜姓李氏自此職貢不絕其後
吐蕃強盛拓拔氏漸爲所逼遂請內徙始移其部落於慶州置靜邊
等州以處之其故地陷於吐蕃其處者爲其役屬吐蕃謂之弭藥又
有黑党項在於赤水之西李靖之擊吐谷渾也渾王伏允奔黑党項
居以空閑之地及吐谷渾舉國內屬黑党項酋長號敦善王因貢方
物又有雪山党項姓破丑民居於雪山之下及白狗春桑白蘭等諸

羗自龍朔已後並爲吐蕃所破而臣屬焉其在西北邊者天授三年
內附凡二十萬口分其地置朝吳浮歸等十州仍散居靈夏等界內
自至德已後常爲吐蕃所誘密以官告授之使爲偵道故時或侵叛
尋亦底盡寶應初其首領來朝請助國供靈州軍糧優詔褒美其在
涇隴州界者後上元元年率其衆十餘萬詣鳳翔節度使崔光遠請
降寶應元年十二月其歸順州部落乾封州部落歸義州部落順化
州部落和寧州部落和義州部落保善州部落寧定州部落羅雲州
部落朝鳳州部落並詣山南西道都防禦使梁州刺史臧希讓請州
印希讓以聞許之貞元三年十二月初禁商賈以牛馬器械於党項
部落寶易十五年二月六州党項自石州奔過河西党項有六府部
落曰野利越詩野利龍兒野利厥律兒黃野海野宰等居慶州者號
爲東山部落居夏州者號爲平夏部落永泰大曆已後居石州依水
草至是永安城鎮將阿史那思昧擾其部落求取駝馬無厭中使又
贊成其事党項不堪其弊遂率部落奔過河元和九年五月復置宥

州以護党項十五年十一月命太子中允李寮爲宣撫党項使以部
落繁富時遠近商賈齎貨入留羊馬至大和開成之際其蕃鎮統
領無緒恣其貪恠不顧危亡或強市其羊馬不辭其直以是部落苦
之遂相率爲盜靈鹽之路小梗會昌初上頻命使安撫之兼命憲臣
爲使分三印以統之在邠寧延者以待御史內供奉崔君會主之在
鹽夏長澤者以待御史內供奉李鄴主之在靈武麟勝者以待御史
內供奉鄭賀主之仍各賜緋魚以重其事久而無狀尋皆罷之
高昌者漢車師前王之庭後漢戍已校尉之故地在京師西四千三
百里其國有二十一城王都高昌其交河城前王庭也田地城校尉
城也勝兵且萬人厥土良沃穀麥歲再熟有蒲萄酒宜五果有草名
白疊國人採其花織以爲布有文字知書計所置官亦採中國之號
焉其王麴伯雅即後魏時高昌王嘉之六世孫也隋煬帝時入朝拜
左光祿大夫車師太守封并國公仍以戚屬宇文氏女爲華容公主
以妻之武德二年伯雅死子文泰嗣遣使來告哀高祖遣前河州刺

史朱惠表往弔之七年文泰又獻狗雄雌各一高六寸長尺餘性
慧能曳馬銜燭云本出拂菻國中國有拂菻狗自此始也太宗嗣位
復貢玄狐裘因賜其妻宇文氏花鎮一具宇文氏復貢玉盤西域諸
國所有動靜輒以奏聞貞觀四年冬文泰來朝及將歸蕃賜遺甚厚
其妻宇文氏請預宗親詔賜李氏封常樂公主下詔慰諭之時西戎
諸國來朝貢者皆塗經高昌文泰後稍擁絕之伊吾先臣西突厥至
是內屬文泰又與葉護連結將擊伊吾太宗以其反覆下書切讓徵
其大臣冠軍阿史那矩入朝將與議事文泰竟不遣乃遣其長史麴
雍來謝罪初大業之亂中國人多投於突厥及頡利敗或有奔高昌
者文泰皆拘留不遣太宗詔令括送文泰尚隱蔽之又尋與西突厥
乙毘設擊破焉耆三城虜其男女而去焉耆王上表訴之太宗遣虞
部郎中李道裕往問其狀十三年太宗謂其使曰高昌數年來朝貢
脫畧無藩臣禮國中署置官號準我百僚稱臣於人豈得如此今茲
歲首萬國來朝而文泰不至增城深塹預備討伐日者我使人至彼

文泰云鷹飛于天雉竄于蒿猫遊于堂鼠安于穴各得其所豈不活耶又西域使欲來者文泰悉拘留之又遣使謂薛延陀云既自為可汗與漢天子敵也何須拜謁其使事入闕禮離間隣好惡而不誅善者何勸明年當發兵馬以擊爾是時薛延陀可汗表請為軍向導以擊高昌太宗許之令民部尚書唐儉至延陀與謀進取太宗異其悔過復下璽書示以禍福徵之入朝文泰稱疾不至太宗乃命吏部尚書侯君集為交河道大摠管率左屯衛大將軍薛萬均及突厥契苾之衆步騎數萬衆以擊之時公卿近臣皆以行經沙磧萬里用兵恐難得志又界居絕域縱得之不可以守競以為諫太宗皆不聽文泰謂所親曰吾往者朝覲見秦隴之比城邑蕭條非復有隋之比設今伐我發兵多則糧運不給若發三萬以下吾能制之加以磧路艱險自然疲頓吾以逸待勞坐收其弊何足為憂也及聞王師臨磧口惶駭計無所出發病而死其子智盛嗣立既而君集兵奄至柳谷進趨出地城將軍契苾何力為前軍與之接戰而退大軍繼之攻拔其城

男女七千餘口進逼其都智盛移君集書曰有罪於天子者先王也谷深譴積身已喪亡智盛襲位無幾君其赦諸君集謂曰若能悔禍當面縛軍門也又命諸軍引衝車拋車以逼之飛石雨下城中大懼智盛窮蹙出城降君集分兵掠地下其三郡五縣二十二城戶八千口二萬七千七百馬四千三百匹其界東西八百里南北五百里先是其國童謡云高昌兵馬如霜雪漢家兵馬如日月日月照霜雪迴手自消滅文泰使人捕其初唱者不能得初文泰與西突厥欲谷設通和遺其金帛約有急相為表裏及聞君集兵至欲谷設懼而西走不敢救君集尋遣使告捷太宗大悅宴百寮班賜各有差曲赦高昌部內從軍兵士已上父子犯死罪已下暮親犯流已下大功犯徒已下小功總麻犯杖罪悉原之時太宗欲以高昌為州縣特進魏徵諫曰陛下初臨天下高昌夫婦先來朝謁自後數月商胡被其逼絕貢獻加之不禮大國遂使王誅載加若罪止文泰斯亦可矣未若撫其人而立其子所謂伐罪弔民威德被於遐外為國之善者也今若

利其土壤以爲州縣常須千餘人鎮守數年一易每及交番死者十
有三四遣辦衣資離別親戚十年之後隴右空虛陛下終不得高昌
撤穀尺布以助中國所謂散有用而事無用臣未見其可太宗不從
竟以其地置西州又置安西都護府留兵以鎮之初西突厥遣其葉
護屯兵於可汗浮圖城與高昌相影響至是懼而來降以其地爲庭
州於是勒石紀功而旋其智盛君臣及其豪右皆徙中國趙氏有國
至智盛凡九世一百三十四年而滅尋拜智盛爲左武衛將軍封金
城郡公弟智湛爲右武衛中郎將太山縣公及太宗崩刊石像智盛
之形列於昭陵玄闕之下智湛麟德中終於左驍衛大將軍西州刺
史天授初其子崇裕授左武衛大將軍交河郡王卒封襲遂絕
吐谷渾其先居於徒河之清山屬晉亂始度隴止於甘松之南洮水
之西南極白蘭數千里有城郭而不居隨逐水草廬帳爲室以肉酪
爲糧其官初有長史司馬將軍近代已來有王公僕射尚書郎中其
俗頗識文字男子通服長裙帽或戴鷩毼婦人以金花爲首飾

紫後綴以珠貝其婚姻富家厚出賍財貧人竊女而去父卒妻其庶
母兄亡妻其諸嫂喪有服制葬訖而除國無常稅用度不給輒斂富
室商人以取足而止殺人及盜馬者罪死他犯則徵物以贖罪氣候
多寒土宜大麥蔓菁頗有菽粟出良馬羴牛銅鐵朱砂之類有青海
周迴八百里中有小山至冬放牝馬於其上言得龍種嘗得波斯馬
放入海因生驄駒能日行千里故代稱青海驄焉地兼鄯善且沫西
北有流沙數百里夏有熱風傷弊行旅風之將至老駝便知之則引
項而鳴以口鼻埋沙中人以爲候即以羶擁蔽口鼻而避其患隋煬
帝時其王伏允來犯塞煬帝親搃六軍以討之伏允以數十騎潛於
泥嶺而遁其仙頭王率男女十餘萬口來降煬帝立其質子順爲王
送之本國令統餘衆尋復追還大業末伏允悉收故地復爲邊患高
祖受禪順自江都來歸長安時李軌猶據涼州高祖遣使與伏允通
和令擊軌以自効當放順返國伏允大悅興兵擊之戰于庫門交綏
而退類遣使朝貢以順爲請高祖廼遣之太宗即位伏允遣其洛陽

公來朝使未返大掠鄯州而去太宗遣使責讓之徵伏允入朝稱疾不至仍為其子尊王求婚於是責其親迎以羈縻之尊王又稱疾不肯入朝有詔停婚遣中郎將康慶直諭以禍福伏允遣兵寇蘭廓二州時鄯州刺史李玄運上言吐谷渾良馬悉牧青海輕兵掩之可致大利於是遣左驍衛大將軍段志玄率邊兵及契苾党項之衆以擊之去青海三十里志玄與左驍衛將軍梁洛仁不欲戰頓軍遲留不進吐谷渾遂驅青海牧馬而遁亞將李君羨率精騎別路及賊於青海之南懸水鎮擊破之虜牛羊二萬餘頭而還時伏允年老昏耄其邪臣天柱王惑亂之拘我行人鴻臚丞趙德楷太宗頻遣宣諭使者十餘返竟無悛心貞觀九年詔特進李靖為西海道行軍大總管兵部尚書侯君集為積石道行軍總管任城王道宗為鄯州道行軍總管仍為靖副涼州都督李大亮為且沫道行軍總管岷州都督李道彥為赤水道行軍總管利州刺史高甌生為鹽澤道行軍總管并突厥契苾之衆以擊之諸將頓與賊遇連戰破之獲其高昌王慕容孝

儁孝儁有雄畧伏允心膂之臣也靖等進至赤海遇其天柱三部落擊大破之遂歷于河源李大亮又俘其名王二十人雜畜數萬至且沫西境或傳伏允西走渡圖倫磧欲入干闥將軍薛萬均率輕銳追奔入磧數百里及其餘黨破之磧中乏水將士皆刺馬血而飲之侯君集與江夏王道宗趣南路登漢哭山飲馬烏海獲其名王梁屈忽經塗二千餘里空虛之地盛夏降霜多積雪其地乏水草將士噉水馬皆食雪又達于栢梁北望積石山觀河源之所出焉兩軍會於大非川至破邏貞谷伏允子大寧王順窮蹙斬其國相天柱王舉國來降伏允大懼與千餘騎遁于磧中衆稍亡散能屬之者纔百餘騎乃自縊而死國人乃立順為可汗稱臣內附順即伏允之嫡子也初為侍子於隋拜金紫光祿大夫父不得歸伏允遂立他子為太子及得返國意常怏怏會李靖等諸軍所向剋捷自以失位欲因此立功由是遂降乃詔曰吐谷渾擅相君長竊據荒裔志在凶德政出權門曾渠攜貳種落怨憤長惡不悛野心彌熾莫顧藩臣之禮曾無事上之

節草竊疆場虐割北庶積惡既稔天亡有徵朕君臨四海含育萬類一物失所責深在予所以爰命六軍申茲九伐義存活國情非黷武其子大寧王慕容順隋氏之甥志懷明悟長自中土幸慕華風爰見時機深識逆順以其悞諫遠衆獨陷迷途遂誅邪臣存茲大計翻然改轍代父歸罪忠孝之美深有可嘉子能立功足以補過既往之釁持宜原免然其建國西鄙已歷年代即從廢絕情所未忍繼其宗祀允歸命胤可封順爲西平郡王仍授越胡呂烏甘豆可汗太宗恐順不能靜其國仍遣李大亮率精兵數千爲其聲援順旣久質於隋國人不附未幾爲臣下所殺其子燕王諾曷鉢嗣立諾曷鉢旣幼大臣爭權國中大亂太宗遣兵援之封爲河源郡王仍授烏地也拔勒豆可汗遣淮陽王道明持節冊拜賜以鼓纛諾曷鉢因入朝請婚十四年太宗以弘化公主妻之資送甚厚十五年諾曷鉢所部丞相王專權陰謀作難將徵兵詐言祭山神因欲襲擊公主劫諾曷鉢奔于吐蕃期有日矣諾曷鉢知而大懼率輕騎走鄯善城其威信王以兵迎

之鄯州刺史杜鳳舉與威信王合軍擊丞相王破之殺其兄弟三人遣使言狀太宗命民部尚書唐儉持節撫慰之太宗崩刻石圖諾曷鉢之形列於昭陵之下高宗嗣位以其尚主拜駙馬都尉賜物四十四段其後與吐蕃互相攻伐各遣使請兵救援高宗皆不許之吐蕃大怒率兵以擊吐谷渾諾曷鉢旣不能禦脫身及弘化公主走投涼州高宗遣右威衛大將軍薛仁貴等救吐谷渾爲吐蕃所敗於是吐谷渾遂爲吐蕃所併諾曷鉢以親信數千帳來內屬詔左武衛大將軍蘇定方爲安置大使始徙其部衆于靈州之地置安樂州以諾曷鉢爲刺史欲其安而且樂也垂拱四年諾曷鉢卒子忠嗣忠卒子宣趙嗣聖曆三年授宣趙左豹韜衛負外大將軍仍襲父烏地也拔勒豆可汗宣趙卒子驥皓嗣驥皓卒子兆嗣及吐蕃陷我安樂州其部衆又東徙散在朔方河東之境今俗多謂之退渾蓋語急而然貞元十四年十二月以朔方節度副使左金吾衛大將軍同正慕容復爲襲長樂州都督青海國王烏地也拔勒豆可汗未幾卒其封襲遂絕吐

谷渾自晉永嘉之末始西渡洮水建國於群羌之故地至龍朔三年
為吐蕃所滅凡三百五十年

焉耆國在京師西四千里東接高昌西鄰龜茲即漢時故地其
王姓龍氏名突騎支勝兵二千餘人常役屬於西突厥其地良沃多
薄畜頗有魚鹽之利貞觀六年突騎支遣使貢方物復請開大磧路
以便行李太宗許之自隋末罹亂磧路遂閉西域朝貢者皆由高昌
及是高昌大怒遂與焉耆結怨遣兵襲焉耆大掠而去西突厥莫賀
設與咄陸弩失畢不協奔于焉耆咄陸復來攻之六年遣使言狀并
貢名馬時西突厥國亂太宗遣中郎將桑孝彥領左右并曹韋弘機
往安撫之仍冊立咄利失可汗可汗既立素善焉耆令與焉耆為援
十二年虜月婁密與高昌攻陷焉耆五城掠男女一千五百人焚其
廬舍而去十四年侯君集討高昌遣使與之相結焉耆王大喜請為
聲援及破高昌其王詣軍門稱謁焉耆人先為高昌所虜者悉歸之
由是遣使謝恩并貢方物具年西突厥重臣在利啜為其弟娶焉耆

王女由是相為唇齒朝貢遂闕安西都護郭孝恪請擊之太宗許焉
耆王弟頡臯葉護兄弟三人來至西州孝恪選步騎三千出銀
山道以頡臯弟栗婆準為鄉導焉耆所都城四面有水自恃險固不
虞於我孝恪倍道兼行夜至城下潛遣將士浮水而渡至曉一時攀
堞鼓角齊震城中大擾孝恪縱兵擊之虜其王突騎支首虜千餘級
以栗婆準導軍有功留攝國事而還時駕幸洛陽宮孝恪鑠突騎支
并其妻子送行在所詔宥之初西突厥屈利啜將兵來援焉耆孝恪
還師三日屈利啜乃囚栗婆準而西突厥處般啜令其吐屯來攝焉
耆遣使朝貢太宗數之曰焉耆者我兵擊得汝何人輒來統攝吐屯
懼而返國焉耆又立栗婆準從父兄薛婆阿那支為王處般啜乃執
栗婆準送於龜茲皆為所殺薛婆阿那支既得處般啜為援遂有國
及阿史那杜爾之討龜茲阿那支大懼遂奔龜茲保其東城以禦官
軍杜爾擊擒之數其罪而斬焉耆求得阿那支從父弟先那準立為王
以修職貢及太宗葬昭陵乃刻石像龍突騎支之形列於玄闕之下

自是朝貢不絕

龜茲國即漢西域舊地也在京師西七千五百里其王姓白氏有城郭屋宇耕田畜牧爲業男女皆剪髮垂與項齊唯王不剪髮學胡書及婆羅門書筭計之事尤重佛法其王以錦蒙項著錦袍金寶帶坐金師子牀有良馬封牛饒蒲萄酒富室至數百碩高祖即位其主蘇伐勃駛遣使來朝敕駛尋卒子蘇伐疊代立號時健莫賀俟利發貞觀四年又遣使獻馬太宗賜以璽書撫慰甚厚由此歲貢不絕然臣於西突厥安西都護郭孝恪來伐焉耆龜茲遣兵援助自是職貢頗闕伐疊死其弟訶黎布失畢代立漸失藩臣禮二十年太宗遣左驍衛大將軍阿史那社爾爲崑山道行軍大摠管與安西都護郭孝恪司農卿楊弘禮率五將軍又發鐵勒十三部兵十餘萬騎以伐龜茲社爾既破西蕃處月處密乃進師趨其北境出其不意西突厥所署焉耆王弃城而遁社爾遣輕騎追擒之龜茲大震守將多弃城而走社爾進屯積石去其都城二百里遣伊州刺史韓威率千餘騎爲前

鋒右驍衛將軍曹繼叔次之西至多褐城與龜茲王相遇及其相那相羯獵等有衆五萬逆拒王師威乃僞遁而引之其王俟利發見威兵少悉衆而至威退行三十里與繼叔軍會合擊大破之其王退保都城社爾進軍逼之王乃輕騎而走遂下其城令孝恪守之遣沙州刺史蘇海政尚輦奉御薛萬備以精騎逼之行六百里其主窘急退保于撥換城社爾等進軍圍之擒其王及大將羯獵頭等其相那利僅以身免潛引西突厥之衆并其國兵萬餘人來襲孝恪殺之官軍大擾倉部郎中崔義起與曹繼叔韓威等擊之那利敗走尋爲龜茲人所執以詣軍前後破其大城五所虜男女數萬口杜爾因立其王之弟葉護爲王勒石紀功而旋俘其王顛黎布失畢及那利羯獵河等獻於社廟尋以訶黎布失畢爲左武翊衛中郎將那利已下授官各有差太宗之葬昭陵乃刻石像其形列於玄闕之前永徽元年又以訶黎布失畢爲右驍衛大將軍尋放還蕃撫其餘衆依舊爲龜茲王賜物一千段先是太宗既破龜茲移置安西都護府於其國城以

郭孝恪為都護兼統于闐踈勒碎葉謂之四鎮高宗嗣位不欲廣地
勞人復命有司弃龜茲等四鎮移安西依舊於西州其後吐蕃大人
焉耆已西四鎮城堡並為賊所陷則天臨朝長壽元年武威軍總管
王孝傑阿史那忠節大破吐蕃克復龜茲于闐等四鎮自此復於龜
茲置安西都護府用漢兵三萬人以鎮之既徵發內地精兵遠逾沙
磧并資遣衣糧等甚為百姓所苦言事者多請棄之則天竟不許其
安西都護則天時有囁揚名中宗時有郭元振開元初則張孝嵩杜
暹皆有政績為夷人所伏

踈勒國即漢時舊地也西帶葱嶺在京師西九千三百里其王姓裴
氏貞觀中突厥以女妻王勝兵二千人俗事祆神有胡書文字貞觀
九年遣使獻名馬自是朝貢不絕開元十六年玄宗遣使冊立其王
裴安定為踈勒王

于闐國西南帶葱嶺與龜茲接在京師西九千七百里勝兵四千人
其國出美玉俗多機巧好事祆神崇佛教先臣于西突厥其王姓尉

遲氏名屈密貞觀六年遣使獻玉帶太宗優詔答之十三年又遣子
入侍及阿史那社爾伐龜茲其王伏闕信大懼使其子以駝萬三百
匹饋軍及將旋師行軍長史薛萬備謂杜爾曰今者既破龜茲國威
已振請因此機願以輕騎羈取于闐之王杜爾乃遣萬備率五十騎
抵于闐之國萬備陳國威靈勸其入見天子伏闕信於是隨萬備來
朝高宗嗣位拜右驍衛大將軍又授其子葉護玷為右驍衛將軍並
賜金帶錦袍布帛六十段并宅一區留數月而遣之因請番子弟以
宿衛太宗葬昭陵刻石像其形列於玄闕之下垂拱三年其王伏闕
雄復來入朝天授三年伏闕雄卒則天封其子璲為于闐國王開元
十六年復冊立尉遲伏師為于闐王數遣使朝貢乾元三年以于闐
王尉遲勝弟守左監門衛率葉護曜為太僕真外卿仍同四鎮節度
副使權知本國事以勝至德初領兵赴國難因堅請留宿衛故有是
命事在勝傳

天竺國即漢之身毒國或云婆羅門地也在葱嶺西北周三萬餘里

其中分爲五天竺其一曰中天竺二曰東天竺三曰南天竺四曰西天竺五曰北天竺地各數千里城邑數百南天竺際大海北天竺拒雪山四周有山爲壁南面一谷通爲國門東天竺東濟大海與扶南林邑鄰接西天竺與罽賓波斯相接中天竺據四天竺之會其都城週迴七十餘里北臨禪連河云昔有婆羅門領徒千人隸業於樹下樹神降之遂爲夫婦宮室自然而立僮僕甚盛於是使役百神築城以統之經日而就此後有阿育王復役使鬼神累石爲宮闕皆雕文刻鏤非人力所及阿育王頗行苛政置炮烙之刑謂之地獄今城中見有其迹焉中天竺王姓乞利啞氏或云利利氏世有其國不相篡弑厥土卑濕暑熱稻歲四熟有金剛似紫石英百鍊不銷可以切玉又有旃檀鬱金諸香通於大秦故其寶物或至扶南交趾貿易焉百姓殷樂俗無簿籍耕王地者輸地利以齒貝爲貨人皆深目長鼻致敬極者舐足摩踵家有奇樂倡伎其王與大臣多服錦罽罽爲螺髻於頂餘髮剪之使拳俗皆徒跣衣重白色唯梵志種姓披白疊以爲

異死者或焚屍取灰以爲浮圖或委之中野以施禽獸或流之於河以飼魚鼈無喪紀之文謀反者幽殺之小犯罰錢以贖罪不孝則斷手則足截耳割鼻放流邊外有文字善天文美曆之術其人皆學悉曇章云是梵天法書於貝多樹葉以紀事不殺生飲酒國中往往有舊佛跡隋煬帝時遣裴矩應接西蕃諸國多有至者唯天竺不通帝以爲恨當武德中其國大亂其嗣王尸羅逸多練兵聚衆所向無敵象不解鞍人不釋甲居六載而四天竺之君皆北面以臣之威勢遠振刑政甚肅貞觀十五年尸羅逸多自稱摩伽陀王遣使朝貢太宗降璽書慰問尸羅逸多大驚問諸國人曰自古曾有摩訶振旦使人至吾國乎皆曰未之有也乃膜拜而受詔書因遣使朝貢太宗以其地遠禮之甚厚復遣衛尉丞李義表報使尸羅逸多遣大臣郊迎傾城邑以縱觀焚香夾道逸多率其臣下東面拜受勅書復遣使獻火珠及鬱金香菩提樹貞觀十年沙門玄策至其國將梵本經論六百餘部而歸先是遣右率府長史王玄策使天竺其四天竺國王咸遣

使朝貢會中天竺王尸羅逸多死國中大亂其臣那伏帝王阿羅那
順篡立乃盡發胡兵以拒玄策玄策從騎三十人與胡禦戰不敵矢
盡悉被擒胡並掠諸國貢獻之物玄策乃挺身宵遁走至吐蕃發精
銳一千二百人并尼婆羅國七千餘騎以從玄策玄策與副使蔣師
仁率二國兵進至中天竺國城連戰三日大破之斬首三千餘級赴
水溺死者且萬人阿羅那順棄城而遁師仁進擒獲之虜男女萬二
千人牛馬三萬餘頭匹於是天竺震懼俘阿羅那順以歸二十二年
至京師太宗大悅命有司告宗廟而謂群臣曰夫人耳目玩於聲色
口鼻耽於臭味此乃敗德之源若婆羅門不劫掠我使人豈爲俘虜
耶昔中山以貪寶取弊蜀侯以金牛致滅莫不由之拜玄策朝散大
夫是時就其國得方士那羅邇娑娑窠自言壽二百歲云有長生之
術太宗深加禮敬館之於金闕門內造延年之藥令兵部尚書崔敦
禮監主之發使天下採諸奇藥異石不可稱數延歷歲月藥成服竟
不効後放還本國太宗之葬昭陵也刻石像阿羅那順之形列於玄

闕之下五天竺所屬之國數十風俗物產略同有加沒路國其俗開
東門以向日王玄策至其王發使貢以奇珍異物及地圖因請老子
像及道德經那揭陀國有醯醢城中有重閣藏佛頂骨及錫杖貞觀
二十年遣使貢方物天授二年東天竺王摩羅枝摩西天竺王尸羅
逸多南天竺王遊婁其拔羅婆北天竺王婁其那那中天竺王地婁
西那並來朝獻景龍四年南天竺國復遣使來朝景雲元年復遣使
貢方物開元二年西天竺復遣使貢方物八年南天竺國遣使獻五
色能言鸚鵡其年南天竺國王尸利那羅僧伽請以戰象及兵馬計
大食及吐蕃等仍未有及名其軍玄宗甚嘉之名軍爲懷德軍九月
南天竺王尸利那羅僧伽寶多枝摩爲國造寺上表乞寺額勅以歸
化爲名賜之十一月遣使冊利那羅僧伽寶多爲南天竺國王遣使來
朝十七年六月北天竺國藏沙門僧密多獻質汗等藥十九年十月
中天竺國王伊沙伏摩遣其大德僧來朝貢二十九年三月中天竺
王子李承恩來朝授游擊將軍放還天寶中累遣使來

罽賓國在葱嶺南去京師萬二千二百里常役屬於大月氏其地暑濕人皆乘象土宜杭稻草木凌寒不死其俗尤信佛法隋煬帝時引致西域前後至者三十餘國唯罽賓不至貞觀十一年遣使獻名馬太宗嘉其誠款賜以繒綵十六年又遣使獻褥特鼠喙尖而尾赤能食蛇有被蛇螫者鼠輒嗅而尿之其瘡立愈明慶三年訪其國俗云王始祖馨孽至今曷樹支父子傳位已十二代其年改其城為修鮮都督府龍朔初授其王修鮮等十一州諸軍事兼修鮮都督開元七年遣使來朝進天文經一夾秘要方并蕃藥等物詔遣冊其王為葛羅達支特勒二十七年其王烏散特勒瀝以年老上表請以子拂寐別婆嗣位許之仍降使冊命天寶四年又冊其子敦匄準為襲罽賓及烏菴國王仍授左驍衛將軍乾元元年又遣使朝貢又有教律國在罽賓吐蕃之間開元中頗遣使朝獻八年冊立其王蘇麟陀逸之為教律國王朝貢不絕二十二年為吐蕃所破

康國即漢康居之國也其王姓溫月氏先居張掖祁連山北昭武城

為突厥所破南依葱嶺遂有其地仗忠以昭武為姓氏不忘本也其人皆深目高鼻多鬚髯丈夫剪髮或辮髮其王冠璽飾以金寶婦人盤髻幪以阜巾飾以金花人多嗜酒好歌舞於道路生子必以石密內口中明膠置掌內欲其成長口常甘言掌持錢如膠之黏物俗習胡書善商賈爭分銖之利男子年二十即遠之傍國來適中夏利之所在無所不到以十二月為歲首有婆羅門為之占星候氣以定吉凶頗有佛法至十一月鼓舞乞寒以水相潑盛為戲樂隋煬帝時其王屈木支娶西突厥葉護可汗女遂臣於西突厥武德十年屈木支遣使獻名馬貞觀九年又遣使貢獅子太宗嘉其遠至命秘書監虞世南為之賦自此朝貢歲至十一年又獻金狍銀狍詔令植之於苑圃萬歲通天年則天封其大首領篤婆鉢提為康國王仍拜左驍衛大將軍鉢提尋卒又冊其子泥涅師師為康國王師師以神龍中卒國人又立突昏為王開元六年遣使貢獻鎖子甲水精杯馬腦瓶駝鳥卵及越諾之類十九年其王烏勒上表請封其子咄曷為曹

國王默啜為米國王許之二十七年烏勒卒遣使冊咄曷襲父位天寶三年又封為欽化王其母可敦封為郡夫人十一載十二載並遣使朝貢

波斯國在京師西一萬五千三百里東與吐火羅康國接北鄰突厥之可薩部西北拒拂菻正西及南俱臨大海戶數十萬其王居有二城復有大城十餘猶中國之離宮其王初嗣位便密選子才堪承統者書其名字封而藏之王死後大臣與王之群子共發封而視之奉所書名者為主焉其王冠金花冠坐獅子牀服錦袍加以瓔珞俗事天地日月水火諸神西域諸胡事火祆者皆詣波斯受法焉其事神以麝香和蘇塗鬚點額及於耳鼻用以為敬拜必交股文字同於諸胡男女皆徒跣丈夫剪髮戴白皮帽衣不開襟并有巾帔多用蘇方吉白色為之兩邊緣以織成錦婦人亦巾帔裙衫辮髮垂後飾以金銀其國乘象而戰每一象戰士百人有敗衄者則盡殺之國人生女年十歲已上有姿貌者其王收而養之以賞有功之臣俗右尊而左

卑以六月一日為歲首斷獄不為文書約束口決於庭其繫囚無年限唯王者代立則釋之其叛逆之罪就火被燒鐵灼其舌瘡白者為理直瘡黑者為有罪其刑有斷手削足髡髮鉗鼻輕罪剪鬚或繫脚於項以志之經時月而釋焉其強盜一入獄至老更不出小盜罰以銀錢死亡則棄之於山制服一月而即吉氣候暑熱土地寬平知耕種多畜牧有鳥形如橐駝飛不能高食草及肉亦能噉犬攬羊土人極以為患又多白馬駿犬或赤日行七百里者駿犬金所謂波斯犬也出驥及大驢腦子白象珊瑚樹高二三尺琥珀車渠瑪瑙火珠玻璃琉璃無食子香附子訶黎勒胡椒葷石蜜千年棗甘露菴隋大業末西突厥葉護可汗頻擊破其國波斯王庫薩和為西突厥所殺其子施利立葉護因分其部帥監統其國波斯竟臣於葉護及葉護可汗死其所令監統者因自擅於波斯不復役屬於西突厥施利立一年卒乃立庫薩和之女為王突厥又殺之施利之子單羯方奔拂菻於是國人迎而立之是為伊恒支在位二年而卒兄子伊嗣候立

二十一年伊嗣候遣使獻一獸名活禡虵形類鼠而色青身長八九寸能入穴取鼠伊嗣候懦弱為大首領所逐遂奔火吐羅未至亦為大食兵所殺其子名卑路斯又投吐火羅葉護獲免卑路斯龍朔元年奏言頻被大食侵擾請兵救援詔遣隴州南出縣令王名遠克使西域分置州縣因列其地疾陵城為波斯都督府授卑路斯為都督是後數遣使貢獻咸亨中卑路斯自來入朝高宗甚加恩賜拜右武衛將軍儀鳳三年令吏部侍郎裴行儉將兵冊送卑路斯為波斯王行儉以其路遠至安西碎裝而還卑路斯獨返不得入其國漸為大食所侵客於吐火羅國二十餘年有部落數千人後漸離散至景龍二年又來入朝拜為左威衛將軍無何病卒其國遂滅而部眾猶存自開元十年至天寶六載凡十遣使來朝并獻方物四月遣使獻瑪瑙牀九年四月獻火毛繡舞筵長毛繡舞筵無孔真珠乾元元年波斯與大食同寇廣州劫倉庫焚廬舍浮海而去大曆六年遣使來朝獻真珠等

拂菻國一名大秦在西海之上東南與波斯接地方萬餘里列城四百邑居連屬其宮宇柱櫨多以水精瑠璃為之有貴臣十二人共治國政常使一人將囊隨王車百姓有事者即以書投囊中王還宮省發理其枉直其王無常人簡賢者而立之國中災異及風雨不時輒廢而更立其王冠形如鳥舉翼冠及瓔珞皆綴以珠寶者錦綉衣前不開襟坐金花牀有一鳥似鶩其毛綠色常在王邊倚枕上坐每進食有毒其鳥輒鳴其都城疊石為之尤絕高峻凡有十萬餘戶南臨大海城東面有大門其高二十餘丈自上及下飾以黃金光輝燦爛連曜數里自外至王室凡有大門三重列異寶雕飾第二門之樓中懸一大金秤以金丸十二枚屬於衡端以候日之十二時焉為一金人其大如人立於側每至一時其金丸輒落鏗然發聲引唱以紀日時臺釐無失其殿以瑟瑟為柱黃金為地象牙為門扇香木為棟梁其俗無瓦搆白石為末羅之塗屋上其堅密光潤還如玉石至於盛暑之節人厭暑熱乃引水潛流上徧於屋宇機制巧密人莫之知觀

者惟聞屋上泉鳴俄見四簷飛溜懸波如瀑激氣成涼風其巧妙如此風俗男子剪髮披帔而右袒婦人不開襟錦為頭巾家資滿億封以上位有羊羔生於土中其國人候其欲萌乃築墻以院之防外獸所食也然其膾與地連割之則死唯人著甲走馬及擊鼓以駭之其羔驚鳴而膾絕便逐水草俗皆髡而衣綉乘輜駟白蓋小車出入擊鼓建旌旗幡幟土多金銀奇寶有夜光璧明月珠駭鷄犀大貝車渠瑪瑙孔翠珊瑚琥珀凡西域諸珍異多出其國隋煬帝常將通拂菻竟不能致貞觀十七年拂菻王波多力遣使獻赤玻璃綠金精等物太宗降爾書荅慰賜以綾綺焉自大食強盛漸陵諸國乃遣大將軍摩拽伐其都城因約為和好請每歲輸之金帛遂臣屬大食焉乾封二年遣使獻氍毹也伽大足元年復遣使來朝開元七年正月其主遣吐火羅大首領獻獅子羚羊各二不數月又遣大德僧來朝貢大食國本在波斯之西大業中有波斯胡人牧駝於俱紛摩地那之山忽有獅子人語謂之曰此山西有三冗冗中大有兵器汝可取之

冗中并有黑石白文讀之便作王位胡人依言果見冗中有石及稍刃甚多上有文教其反叛於是糾合亡命渡恒曷水劫奪商旅其衆漸盛遂割據波斯西境自立為王波斯拂菻各遣兵討之皆為所敗永徽二年始遣使朝貢其姓大食氏名噉密莫未曠自云有國已三十四年歷三主矣其國男兒色黑多鬚鼻大而長似婆羅門婦人白皙亦有文字出駝馬大於諸國兵刃勁利其俗勇於戰鬥好事天神土多沙石不堪耕種唯食駝馬等肉俱紛地那山在國之西南鄰於大海其王移冗中黑石寘之於國又嘗遣人乘舡將衣糧入海經八年而未及西岸海中見一方石石上有樹幹赤葉青樹上摠生小兒長六七寸見人皆笑動其手脚頭著樹枝其使摘取一枝小兒便死収在大食王宮又有女國在其西北相去三月行龍朔初擊破波斯又破拂菻始有米麵之屬又將兵南侵婆羅門吞併諸胡國勝兵四十餘萬長安中遣使獻良馬景雲二年又獻方物開元初遣使來朝進馬及寶鈿帶等方物其使謁見唯平立不拜憲司欲糾之中書令

張說奏曰大食殊俗慕義遠來不可宣罪上特許之尋又遣使朝獻
自云在本國惟拜天神雖見王亦無致拜之法所司屢詰責之其使
遂請依漢法致拜其時西域康國石國之類皆臣屬之其境東西萬
里東與突厥施相接焉一云隋開皇中大食族中有孤列種代爲酋
長孤列種中又有兩姓一號盆泥奚深一號盆泥末換其奚深後有
摩訶末者勇健多智衆立之爲主東西征伐開地三千里兼剋夏臘
一名彭城音所摩訶末後十四代至末換末換殺其兄伊疾而自
立復殘忍其下怨之有呼羅珊木麤人並波悉林舉義兵應者悉令
著黑衣旬月間衆盈數萬鼓行而西生擒末換殺之遂求得奚深種
阿蒲羅拔立之末換已前謂之白衣大食自阿蒲羅拔後改爲黑衣
大食阿蒲羅拔卒立其弟阿蒲恭拂至德初遣使朝貢代宗時爲元
帥亦用其國兵以收兩都寶應大曆中頗遣使來恭拂卒子迷地立
迷地卒子卒栖立卒栖卒弟訶論立貞元中與吐蕃爲勍敵蕃軍太
半西禦大食故鮮爲邊患其力不足也十四年詔以黑衣大食使言

塞馬雞沙北三人並爲中郎將各放還蕃

史臣曰西方之國綿亘山川自張騫奉使已來介子立功之後通於
中國者多矣有唐拓境遠極安西弱者德以懷之強者力以制之開
元之前貢輸不絕天寶之亂邊徼多虞邠郊之西卽爲戎狄葉街之
邠來朝亦稀故古先哲王務寧華夏語曰近者悅遠者來斯之謂矣
賁曰大蒙之人西方之國與時盛衰隨世通塞勿謂我心不懷我德
貞觀開元葉街充斥

唐書列傳卷第一百四十八

唐書列傳卷第一百四十九上

東夷

高麗

百濟

新羅

倭國

日本

劉 昫 等修

聞人詮校刻沈桐同校

高麗者出自扶餘之別種也其國都於平壤城即漢樂浪郡之故地
 在京師東五千一百里東渡海至于新羅西北渡遼水至于營州南
 渡海至于百濟北至靺鞨東西三千一百里南北二千里其官大者
 號大對盧比一品總知國事三年一代若稱職者不拘年限交替之
 日或不相祗服皆勒兵相攻勝者為之其王但閉宮自守不能制禦
 次曰太次比正二品對盧已下官總十二級外置州縣六十餘城
 大城置偃陞一比都督諸城置道使比刺史其下各有僚佐分掌曹
 事衣裳服飾唯王五綵以白羅為冠白皮小帶其冠及帶咸以金飾
 官之貴者則青羅為冠次以緋羅插二鳥羽及金銀為飾衫筒袖袴
 大口白韋帶黃韋屨國人衣褐戴弁婦人首加巾幘好圍碁投壺之

唐書列傳卷第一百四十九上
 高麗 百濟 新羅 倭國 日本
 劉 昫 等修
 聞人詮校刻沈桐同校

戲人能楚鞠食用籩豆簠簋罇俎壘洗頗有箕子之遺風其所居必依山谷皆以茅草葺舍唯佛寺神廟及王宮官府乃用瓦其俗貧窶者多冬月皆作長坑下燃焜火以取暖種田養蠶畧同中國其法有謀反叛者則集衆持火炬競燒灼之焦爛備體然後斬首家悉籍沒守城降敵臨陣敗北殺人行劫者斬盜物者十二倍酬贓殺牛馬者沒身為奴婢大體用法嚴峻少有犯者乃至路不拾遺其俗多淫祀事靈星神五神可汗神箕子神國城東有大穴名隧神皆以十月王自祭之俗愛書籍至於衡門廝養之家各於街衢造大屋謂之高堂子弟未婚之前晝夜於此讀書習射其書有五經及史記漢書范曄後漢書三國志孫盛晉春秋玉篇字統字林又有文選尤愛重之其王高建武即前王高元異母弟也武德二年遣使來朝四年又遣使朝貢高祖感隋末戰士多陷其地五年賜建武書曰朕恭膺寶命君臨率土祇順三靈綏柔萬國普天之下情均撫字日月所照咸使又安王旣統攝遼左世居藩服思稟正朔遠循職貢故遣使者跋涉山川

申布誠懇朕甚嘉焉方今六合寧晏四海清平玉帛旣通道路無難方申輯睦未敢聘好各保疆場豈非盛美但隋氏季年連兵構難攻戰之所各失其民遂使骨肉乖離室家分析多歷年歲怨曠不申今二國通和義無阻異在此所有高麗人等已令追括尋即遣送彼處有此國人者王可放還務盡撫育之方共弘仁恕之道於是建武悉搜括華人以禮賓送前後至者萬數高祖大喜七年遣前刑部尚書沈叔安往冊建武爲上柱國遼東郡王高麗王仍將天尊像及道士往彼爲之講老子其王及道俗等觀聽者數千人高祖嘗謂侍臣曰名實之間理須相副高麗稱臣於隋終拒煬帝此亦何臣之有朕敬於萬物不欲驕貴但據有土宇務共安人何必令其稱臣以自尊大即爲詔述朕此懷也侍中裴矩中書侍郎溫彥博曰遼東之地周爲箕子之國漢家玄菟郡耳魏晉已前近在提封之內不可許以不臣且中國之於夷狄猶太陽之對列星理無降尊俯同藩服高祖乃止九年新羅百濟遣使訟建武云閉其道路不得入朝又相與有隙屢

相侵掠詔員外散騎侍郎生子奢往和鮮之建武奉表謝罪請與新羅對使會盟貞觀二年破突厥頡利可汗建武遣使奉賀并上封域圖五年詔遣廣州都督府司馬長孫師往收瘞隋時戰亡骸骨毀高麗所立京觀持武懼發其冢舉築長城東北自扶餘城西南至海千有餘里十四年遣其太子恒權來朝并貢方物太宗優勞甚至十六年西部大人蓋蘇文攝職有犯諸大臣與建武議欲誅之事洩蘇文乃悉召部兵云將校閱并盛陳酒饌於城南諸大臣皆來臨視蘇文勒兵盡殺之死者百餘人焚倉庫因馳入王宮殺建武立建武弟大陽子藏為王自立為莫離支猶中國兵部尚書兼中書令職也自是專國政蘇文姓錢氏鬚貌甚偉形體魁傑身佩五刀左右莫敢仰視恒令其屬官俯伏於地踐之上馬及下馬亦如之出必先布隊仗導者長呼以辟行人百姓畏避皆自投坑谷太宗聞建武死為之舉哀使持節弔祭十七年封其嗣王藏為遼東郡王高麗王又遣司農丞相里玄獎督齎書往說諭高麗令勿攻新羅蓋蘇文謂玄獎曰高麗

新羅怨隙已久往者隋室相侵新羅乘釁奪高麗五百里之地城邑新羅皆據有之自非反地還城此兵恐未能已玄獎曰既往之事焉可追論蘇文竟不從太宗顧謂侍臣曰莫支離賊弑其主盡殺大臣用刑有同坑穽百姓轉動輒死怨痛在心道路以目夫出師弔伐須有其名因其弑君虐下敗之甚易也十九年命刑部尚書張亮為平壤道行軍大總管領將常何等率江淮嶺嶺勁卒四萬戰船五百艘自萊州汎海趨平壤又以特進英國公李勣為遼東道行軍大總管禮部尚書江夏王道宗為副領將軍張士貴等率步騎六萬趨東兩軍合勢太宗親御六軍以會之夏四月李勣軍度遼進攻蓋牟城拔之獲生口二萬以其城置蓋州五月張亮副將程名振攻沙卑城拔之虜其男女八千口是日李勣進軍於遼東城帝攻遼澤詔曰頃者隋師渡遼時非天替從軍士卒骸骨相望徧於原野良可哀歎掩骼之義誠為先典其令並收瘞之國內及新城步騎四萬來援遼東江夏王道宗率騎四千逆擊大破之斬首千餘級帝渡遼水詔撤橋梁

以堅士卒志帝至遼東城下見士卒負擔以填塹者帝分其尤重者親於馬上持之從官悚動爭濟以送城下時李勣已率兵攻遼東城高麗聞我有拋車飛三百觔石於一里之外者甚懼之乃於城上積木爲戰樓以拒飛石勣列車發石以擊其城所遇盡潰又推撞車撞其樓閣無不傾倒帝親率甲騎萬餘與李勣會圍其城俄而南風甚勁命縱火焚其西南樓延燒城中屋宇皆盡戰士登城賊乃大潰燒死者萬餘人俘其勝兵萬餘口以其城爲遼州初帝自定州命每數十里置一烽屬于遼城與太子約克遼東當舉烽是日帝命舉烽傳入塞師次白崖城命攻之右衛大將軍李思摩中弩矢帝親爲吮血將士聞之莫不感勵其城因山臨水四面險絕李勣以撞車撞之飛石流矢雨集城中六月帝臨其西北城主孫伐音潛遣使請降曰臣已願降其山有貳者詔賜以旗幟曰必降建之城上伐音舉幟於城上高麗以爲唐兵登也乃悉降初遼東之陷也伐音乞降旣而中悔帝怒其反覆許以城中人物分賜戰士及是李勣言於帝曰戰士奮厲

爭先不顧矢石者貪虜獲耳今城垂拔柰何更許其降無乃辜將士之心乎帝曰將軍言是也然縱兵殺戮虜其妻孥朕所不忍也將軍麾下有功者朕以庫物賞之庶因將軍贖此一城遂受降獲士女一萬勝兵二千四百以其城置巖州授孫伐音爲巖州刺史我軍之渡遼也莫離支遣加尸城七百人戍蓋牟城李勣盡虜之其人並請隨軍自効太宗謂曰誰不欲爾之力爾家悉在加尸爾爲吾戰彼將爲戮矣破一家之妻子求一人之力用吾不忍也悉令放還車駕進次安市城北列營進兵以攻之高麗北部僭薩高延壽南部稱薩高惠貞率高麗靺鞨之衆十五萬來援安市城賊中有對盧年老習事謂延壽曰吾聞中國大亂英雄並起秦王神武所向無敵遂平天下南面爲帝北夷請服西戎獻款今者傾國而至猛將銳卒悉萃於此其鋒不可當也今爲計者莫若頓兵不戰曠日持久分遣驍雄斷其饋運不過旬日軍糧必盡求戰不得欲歸無路此不戰而取勝也延壽不從引軍直進太宗夜召諸將躬自指麾遣李勣率步騎一萬五千

於賊西嶺爲陣長孫無忌率牛進達等精兵一萬一千以爲奇兵自
山北於狹谷出以衝其後太宗自將步騎四千潛鼓角偃旌幟趨賊
營北高峯之上令諸軍聞鼓角聲而齊縱因令所司張受降幕於朝
堂之側曰明日午時納降虜於此矣遂率軍而進明日延壽獨見李
勣兵欲與戰太宗遙望無忌軍塵起令鼓角並作旗幟齊舉賊衆大
懼將分兵禦之而其陣已亂李勣以步卒長槍一萬擊之延壽衆敗
無忌縱兵乘其後太宗又自山而下引軍臨之賊因大潰斬首萬餘
級延壽等率其餘寇依山自保於是命無忌勣等引兵圍之徹東川
梁以斷歸路太宗按轡徐行觀賊營壘謂侍臣曰高麗領國而來存
亡所繫一麾而敗天佑我也因下馬再拜以謝天延壽惠首率十五
萬六千八百人請降太宗引入棘門延壽等膝行而前拜手請命太
宗簡傳陞以下酋長三千五百人授以戎秩遷之內地收靺鞨三千
三百盡坑之餘衆放還平壤獲馬三萬疋牛五萬頭明光甲五千領
他器械稱是高麗國振駭后黃城及銀城並自拔數百里無復人烟

因名所幸山爲駐蹕山領將作造破陣圖命中書侍郎許敬宗爲文
勒石以紀其功授高延壽鴻臚卿高惠貞司農卿張亮又與高麗再
戰於建安城下皆破之於是列長圍以攻焉八月移營安市城東李
勣遂攻安市擁延壽等降衆營其城下以招之城中人堅守不動每見
太宗旄麾必乘城鼓譟以拒焉帝甚怒李勣曰請破之日男子盡誅
城中聞之人皆死戰乃令江夏王道宗築土山攻其城東南隅高麗
亦裨城增雉以相抗李勣攻其西面令拋石撞車壞其樓雉城中隨
其崩壞即立木爲柵道宗以樹條苞壤爲土屯積以爲山其中間五
道加木被土於其上不捨晝夜漸以逼城道宗遣果毅都尉傅伏愛
領隊兵於山頂以防敵土山自高而陟排其城城崩會伏愛私離所
部高麗百人自頽城而戰遂據有土山而塹斷之積火縈盾以自固
太宗大怒斬伏愛以徇命諸將擊之三日不能尅太宗以遼東倉儲
無幾士卒寒凍乃詔班師歷其城中皆屏聲偃幟城主登城拜手奉
辭太宗時嘉其堅守賜絹百疋以勵事君之節初攻陷遼東城其中

抗拒王師應沒為奴婢者一萬四千人並遣先集幽州將分賞將士
太宗愍其父母妻子一朝分散令有司準其直以布帛贖之赦為百
姓其衆歡呼之聲三日不息高延壽自降後常積歎尋以憂死惠貞
竟至長安二十年高麗遣使來謝罪并獻二美女太宗謂其使曰歸
謂爾主美色者人之所重爾之所獻信為美麗憫其離父母兄弟於
本國留其身而忘其親愛其色而傷其心我不取也並還之二十二
年又遣右武衛將軍薛萬徹等往青丘道伐之萬徹渡海入鴨綠水
進破其泊灼俘獲甚衆太宗又命江南造大船遣陝州刺史孫伏伽
召募勇敢之士萊州刺史李道裕運糧及器械貯於烏湖島將欲大
舉以伐高麗未行而帝崩高宗嗣位又命兵部尚書任雅相左武衛
大將軍蘇定方左驍衛大將軍契苾何力等前後討之皆無大功而
還乾封元年高藏遣其子入朝陪位於太山之下其年蓋蘇文死其
子男生代為莫離支與其弟男建男產不睦各樹朋黨以相攻擊男
生為二弟所逐走據國內城死守其子獻誠詣闕求哀詔令左驍衛六

將軍契苾何力率兵應接之男生脫身來奔詔授特進遼東大都督
兼平壤道安撫大使封玄菟郡公十一月命司空英國公李勣為遼
東道行軍大總管率裨將郭待封等以征高麗二年二月勣度遼至
新城謂諸將曰新城是高麗西境鎮城最為要害若不先圖餘城未
易可下遂引兵於新城西南據山築柵且攻且守城中窘迫數有降
者自此所向剋捷高藏及男建遣太大兄男產將首領九十八人持
帛幡出降諸使入朝勣以禮延接男建猶閉門固守總章九年九月
勣又移營於平壤城南男建頻遣兵出戰皆大敗男建下捉兵總管
僧信誠密遣人詣軍中許開城門為內應經五日信誠果開門勣從
兵入登城鼓譟燒城門樓四面火起男建窘急自刺不死十一月拔
平壤城虜高藏男建等十二月至京師獻俘於含元宮詔以高藏政
不由已授司平太常伯男產先降授司宰少卿男建配流黔州男生
以鄉導有功授右衛大將軍封汴國公特進如故高麗國舊分為五
部有城百七十六戶六十九萬七千乃分其地置都督府九州四十二

縣一百又置安東都護府以統之擢其酋渠有功者授都督刺史及縣令與華人參理百姓乃遣左武衛將軍薛仁貴總兵鎮之其後頗有逃散儀鳳中高宗授高藏開府儀同三司遼東都督封朝鮮王居安東鎮本蕃為主高藏至安東潛與靺鞨相通謀叛事覺召還配流邛州并分徙其人散向河南隴右諸州其貧弱者留在安東城傍高藏以永淳初卒贈衛尉卿詔送至京師於頡利墓左賜以葬地兼為樹碑垂拱二年又封高藏孫寶元為朝鮮郡王聖曆元年進授左鷹揚衛大將軍封為忠誠國王委其統攝安東舊戶事竟不行二年又授高藏男德武為安東都督以領本蕃自是高麗舊戶在安東者漸寡少分投突厥及靺鞨等高氏君長遂絕矣男生以儀鳳初卒於長安贈并州大都督子獻誠授右衛大將軍兼令羽林衛上下天授中則天嘗內出金銀寶物令宰相及南北衙文武官內擇善射者五人共賭之內史張光輔先讓獻誠為第一獻誠復讓右王鈐衛大將軍薛吐摩支摩支又讓獻誠既而獻誠奏曰陛下令簡能射者五人所

得者多非漢官臣恐自此已後無漢官工射之名伏望停寢此射則天嘉而從之時酷吏來俊臣嘗求貨於獻誠獻誠拒而不答遂為俊臣所構誣其謀反縊殺之則天後知其冤贈右羽林衛大將軍以禮改葬百濟國本亦扶餘之別種嘗為馬韓故地在京師東六千貳百里處大海之北小海之南東北至新羅西渡海至越州南渡海至倭國北渡海至高麗其王所居有東西兩城所置內官曰內臣佐平掌宣納事內頭佐平掌庫藏事內法佐平掌禮儀事衛士佐平掌宿衛兵事朝廷佐平掌刑獄事兵官佐平掌在外兵馬事又外置六帶方管十郡其用法叛逆者死籍沒其家殺人者以奴婢三贖罪官人受財及盜者三倍追贓仍終身禁錮凡諸賦稅及風土所產多與高麗同其王服大袖紫袍青錦袴烏羅冠金花為飾素皮帶烏草履官人盡緋為衣銀花飾冠庶人不得衣緋紫歲時伏臘同於中國其書籍有五經子史又表疏並依中華之法武德四年其王扶餘璋遣使來獻果及馬七年又遣大臣奉表朝貢高祖嘉其誠款遣使就冊為

帶方郡王百濟王自是歲遣朝貢高祖撫勞甚厚因訟高麗閉其道
路不許來通中國詔遣朱子奢往和之又相與新羅世爲讐敵數相
侵伐貞觀元年太宗賜其王璽書曰王世爲君長撫有東蕃海隅遐
曠風濤艱阻忠欵之至職貢相尋尚想徽猷甚以嘉慰朕自祗承寵
命君臨區宇思弘王道愛育黎元舟車所通風雨所及期之遂性咸
使又安新羅王金貞平朕之藩臣之鄰國每聞遣師征討不息阻兵
安忍殊乖所望朕已對王姪信福及高麗新羅使人具勅通和咸許
輯睦王必須忘彼前怨識朕本懷共篤鄰情即停兵革璋因遣使奉
表陳謝雖外稱順命內實相仇如故十一年遣使來朝獻鐵甲騏斧
宗優勞之賜綵帛三千段并錦袍等十五年璋卒其子義慈遣使奉
表告哀太宗素服哭之贈光祿大夫賻物二百段遣使冊命義慈爲
柱國封帶方郡王百濟王十六年義慈與兵伐新羅四十餘城又發
兵以守之與高麗和親通好謀欲取党項城以絕新羅入朝之路新
羅遣使告急請救太宗遣司農丞相里玄獎齎書告諭兩蕃示以禍

福及太宗親征高麗百濟懷二乘虛襲破新羅十城二十二年又破
其十餘城數年之中朝貢遂絕高宗嗣位求徽二年始又遣使朝貢
使還降璽書與義慈曰至如海東三國開基自久並列疆界地實大
牙近代已來遂構嫌隙戰爭交起略無寧歲遂今三韓之氓命懸刀
俎尋戈肆憤朝夕相仍朕代天理物載深矜愍去歲王攻高麗新
羅等使並來入朝朕命釋茲讎怨更敦欵穆新羅使金法敏奏書高
麗百濟唇齒相依競舉兵戈侵逼交至大城重鎮並爲百濟所併疆
宇日蹙威力並謝乞詔百濟令歸所侵之城若不奉詔即自興兵打
取但得故地即請交和朕以其言旣順不可不許昔齊桓列土諸侯
尚存亡國况朕萬國之主豈可不卹危藩王所兼新羅之城並宜還
其本國新羅所獲百濟俘虜亦遣還王然後解息釋紛韜戈偃革百
姓獲息肩之願三蕃無戰爭之勞比夫流血邊亭積屍疆場耕織並
廢士女無聊豈可同年而語美王若不從進止朕已依法敏所請任
其與王決戰亦令約束高麗不許遠相救恤高麗若不承命即令契

冊諸蕃度遼澤入抄掠王可深思朕言自求多福審圖良策無貽後悔六年新羅王金春秋又表稱百濟與高麗韓朝侵其北界已沒三十餘城顯慶五年命左衛大將軍蘇定方統兵討之大破其國虜義慈及太子隆小王孝演爲將五十八人等送於京師上責而有之其國舊分爲五部統部三十七城二百戶七十六萬至是乃以其地分置熊津馬韓東明等五都督府各統州縣立其酋渠爲都督刺史及縣令命右衛郎將王文度爲熊津都督總兵以鎮之義慈事親以孝行聞友于兄弟時人號海東曾閔及至京數日而卒贈金紫光祿大夫衛尉卿特許其舊臣赴哭送就孫皓陳叔寶墓側葬之并爲豎碑文度濟海而卒百濟僧道琛僖將福信率衆據周留城以叛遣使往倭國迎故王子扶餘豐立爲王其西部北部並翻城應之時卽將劉仁願留鎮於百濟府城道琛等引兵圍之帶方州刺史劉仁軌代文度統衆便道發新羅兵合契以救仁願轉鬪而前所向皆下道琛等於熊津江口立兩柵以拒官軍仁軌與新羅兵四面夾擊之賊衆退

走入柵阻水橋狹墮水及戰死萬餘人道琛等乃釋仁願之圍退保任存城新羅兵士以糧盡引還時龍朔元年二月也於是道琛自稱領軍將軍福信自稱霜岑將軍招誘叛亡其勢益張使告仁軌曰聞大唐與新羅約誓百濟無問老少一切殺之然後以國付新羅與其受死豈若戰亡所以聚結自固守耳仁軌作書具陳禍福遣使諭之道琛等恃衆驕倨置仁軌之使於外館傳語謂曰使人官職小我是一國大將不合自參不答書遣之尋而福信殺道琛併其兵衆扶餘豐但主祭而已二年七月仁願仁軌等率留鎮之兵大破福信餘衆於熊津之東拔其支羅城及尹城大山沙井等柵殺獲甚衆仍令分兵以鎮守之福信等以貞峴城臨江高險又當衝要加兵守之仁軌引新羅之兵乘夜薄城四面攀堞而上比明而入據其城斬首八百級遂通新羅運糧之路仁願乃奏請益兵詔發淄青萊海之兵七千人遣左威衛將軍孫仁師統衆浮海赴熊津以益仁願之衆時福信旣專其兵權與扶餘豐漸相猜貳福信稱疾卧於窟室將候扶餘豐

問疾謀襲殺之扶餘豐覺而率其親信掩殺福信又遣使往高麗
倭國請兵以拒官軍孫仁師中路迎擊破之遂與仁願之衆相合
士大振於是仁師仁願及新羅王金法敏帥陸軍進劉仁軌及別
社爽扶餘隆率水軍及糧船自熊津江往白江以會陸軍同趨周
城仁軌遇扶餘豐之衆於白江之口四戰皆捷焚其舟四百艘賊衆
大潰扶餘豐脫身而走僞王子扶餘忠勝忠志等率士女及倭衆並
降百濟諸城皆復歸順孫仁師與劉仁願等振旅而還詔劉仁軌代
仁願率兵鎮守乃授扶餘隆熊津都督遣還本國共新羅和親以招
輯其餘衆麟德二年八月隆到熊津城與新羅王法敏刑白馬而盟
先祀神祇及州谷之神而後歃血其盟文曰星者百濟先王迷於逆順
不敦鄰好不睦親姻結託高麗交通倭國共爲殘暴侵削新羅破邑
屠城略無寧歲天子憫一物之失所憐百姓之無辜頻命行人遣其
和好負險恃遠侮慢天經皇赫斯怒恭行弔伐旌旗所植一歲火定
固可猶宮巧宅作誠來裔寒源技本垂訓後昆然懷柔代後前正之

令典興亡繼絕往哲之通規事必師古傳諸曩冊故立前百濟太子
司椽正卿扶餘隆爲熊津都督守其祭祀保其桑梓依倚新羅長爲
與國各除宿憾結好和親恭承詔命永爲藩服仍遣使人右威衛將
軍魯城縣公劉仁願親臨勸諭具宣成昔約之以婚姻申之以盟誓
刑牲歃血共敦終始分災恤患恩若弟兄祇奉綸言不敢失墜既盟
之後共保歲寒若有棄信不恒二三其德興兵動衆侵犯邊陲明神
鑒之百殃是降子孫不昌社稷無守禋祀磨滅罔有遺餘故作金書
鐵契藏之宗廟子孫萬代無或敢犯神之聽之是饗是福劉仁軌之
辭也歛訖埋幣帛於壇下之吉地藏其盟書於新羅之廟仁願仁軌
等旣還隆懼新羅尋歸京師儀鳳二年拜光祿大夫太常員外卿兼
熊津都督兼方郡王令歸本蕃安輯餘衆時百濟本地荒毀漸爲新
羅所據隆竟不敢還舊國而卒其孫敬則天朝襲封帶方郡王授衛
尉卿其地自此爲新羅及渤海靺鞨所分百濟之種遂絕
新羅國本弁韓之苗裔也其國在漢時樂浪之地東及南方俱限大

海西接百濟北鄰高麗東西千里南北二千里有城邑村落王之所居曰金城周七八里衛兵三千人設獅子隊文武官凡有十七等其王金貞平隋文帝時授上開府樂浪郡公新羅王武德四年遣使朝貢高祖親勞問之遣通直散騎侍郎庾文素往使焉賜以璽書及畫屏風錦綵三百段自此朝貢不絕其風俗刑法衣服與高麗百濟略同而朝服尚白好祭山神其食器用柳栝亦以銅及瓦國人多金朴兩姓異姓不為婚重元日相慶賀燕饗每以其日拜日月神又重八月十五日設樂飲宴群臣射其髮婦人髮繞頭以綵及珠為飾髮甚長美高祖既聞海東三國舊結怨隙遞相攻伐以其俱為藩附務在和睦乃問其使為怨所由對曰先是百濟往伐高麗請新羅請救新羅發兵大破百濟國因此為怨每相攻伐新羅得百濟王殺之怨由此始七年遣使冊拜金貞平為柱國封樂浪郡王新羅王貞觀五年遣使獻女樂二人皆鬢髮美色太宗謂侍臣曰朕聞聲色之娛不如好德且山川阻遠懷土可知近日林邑獻白鸚鵡尚解思鄉訴請還國

鳥猶如此況人情乎但愍其遠來必思親戚宜付使者聽遣還家是歲貞平卒無子立其女善德為王宗室大臣乙祭總知國政詔贈貞平左光祿大夫賻物二百段九年遣使持節冊命善德柱國封樂浪郡王新羅王十七年遣使上言高麗百濟累相攻讐亡失數十城兩國連兵意在戒臣社稷謹遣陪臣歸命大國乞偏師救助太宗遣相里玄獎齎璽書賜高麗曰新羅委命國家不闕朝獻爾與百濟宜即戰兵若更攻之明年當出師擊爾國矣太宗將親伐高麗詔新羅募集士馬應接大軍新羅遣大臣領兵五萬人入高麗南界攻水口城降之二十一年善德卒贈光祿大夫餘官封並如故因立其妹貞德為王加授柱國封樂浪郡王二十二年貞德遣其弟國相伊替于金春秋及其子文正來朝詔授春秋為特進文正為左武衛將軍春秋請詣國學觀釋奠及講論太宗因賜以所制温湯及晉祠碑并新撰晉書將歸國令三品已上宴餞之優禮甚稱永徽元年貞德大破百濟之衆遣其弟法敏以聞貞德乃織錦作五言太平頌以獻之其詞

曰大唐開洪業魏皇猷昌止戈戎衣定修文繼百王統天崇雨施
理物體含章深仁借日月撫運邁陶唐幡旗旣赫赫鉦鼓何鏗鏘外
夷違命者翦覆被天殃淳風凝幽顯遐邇競呈祥四時和王燭十曜
巡萬方維岳降宰輔維帝任忠良五三成一德昭我唐家光帝嘉之
拜法敏為太府卿五年貞德卒為舉哀詔以春秋嗣立為新羅王加
授開府儀同三司封樂浪郡王六年百濟與高麗蘇靺鞨率兵侵其北
界攻陷三十餘城春秋遣使上表求救顯慶五年命左武衛大將軍
蘇定方為熊津道大總管統水陸十萬仍令春秋為岨夷道行軍總
管與定方討平百濟俘其王扶餘義慈獻于闕下自是新羅漸有高
麗日齊之地其界益大西至于海龍胡元年春秋卒詔其子太府卿
法敏嗣位為開府儀同三司上柱國樂浪郡王新羅主三年詔以其
國為鷄林州都督府授法敏為鷄林州都督法敏以開耀元年卒其
子政明嗣位垂拱二年政明遣使來朝因上表請唐禮一部并雜文
章則天令所司寫吉凶要禮并於文館詞林採其詞涉規誡者勅代

五十卷以賜之天授三年政明卒則天為之舉哀遣使弔祭冊立其
子理洪為新羅王仍令襲父輔國大將軍行豹輔衛大將軍鷄林州
都督理洪以長安二年卒則天為之舉哀輟朝二日遣立其弟興光
為新羅王仍襲兄將軍都督之號興光本名與太宗同先恢則天改
為開元十六年遣使來獻方物又上表請令人就中國學問經教上
許之二十一年渤海靺鞨越海入寇登州時興光族人金思蘭先因
入朝留京師拜為太僕負外卿至是遣歸國發兵以討靺鞨仍加授
興光為開府儀同三司寧海軍使二十五年興光卒詔贈太子太保
仍遣左贊善大夫邢璣攝鴻臚少卿往新羅弔祭并冊立其子承慶
襲父開府儀同三司新羅王璣將進發上製詩序太子以下及百寮
咸賦詩以送之上謂璣曰新羅號為君子之國頗知書記有類中華
以卿學術善與講論故選使克此到彼宜闡揚經典使知大國儒教
之盛又聞其人多善奕碁因令善碁人率府兵曹揚季鷹為璣之副
璣等至彼大為蕃人所敬其國碁者皆在季鷹之下於是厚賂璣等

金寶及藥物等天寶二年承慶卒詔遣贊善大夫魏曜往弔祭之冊立其弟憲英爲新羅王并襲其兄官爵大曆二年憲英卒國人立其子乾運爲王仍遣其大臣金隱居奉表入朝貢方物請加冊命三年上遣倉部郎中兼御史中丞賜紫金魚袋歸崇敬持節齎冊書往弔冊之以乾運爲開府儀同三司新羅王仍冊乾運母爲太妃七年遣使金標石來賀正授衛尉員外少卿放還八年遣使來朝并獻金銀牛黃魚牙納朝霞紬等九年至十二年比歲遣使來朝或一歲再至建中四年乾運卒無子國人立其上相金良相爲王貞元元年授良相檢校太尉都督鷄林州刺史寧海軍使新羅王仍令戶部郎中蓋墳持節冊命其年良相卒立上相敬信爲王令襲其官爵敬信即從兄弟也十四年敬信卒其子先敬信亡國人立敬信嫡孫俊邕爲王十六年授俊邕開府儀同三司檢校太尉新羅王令司封郎中兼御史中丞常冊持節冊命冊至鄆州聞俊邕卒其子重興無詔冊還來貞元年詔遣兵部郎中元季方持節冊重興爲王元和元年十一月

放宿衛王子金獻忠歸本國仍加試祕書監三年遣使金刀奇來朝其年七月力奇上言貞元十六年奉詔冊臣故主金俊邕爲新羅王毋申氏爲太妃妻叔氏爲王妃冊使韋冊至中路知俊邕薨其冊却迴在中書省今臣還國伏請授臣以歸勅金俊邕等冊宜令鴻臚寺於中書省受領至寺宣授與金力奇令奉歸國仍賜其叔彥昇門戟令本國準例給四年遣使金陸珍等來朝貢五年王子金憲章來朝貢七年重興卒立其相金彥昇爲王遣使金昌南等來告哀其年七月授彥昇開府儀同三司檢校太尉持節大都督鷄林州諸軍事兼持節克寧海軍使上柱國新羅國王彥昇妻貞氏冊爲妃仍賜太宰相金崇斌等三人戟亦令本國準例給兼命職方員外郎攝御史中丞崔廷持節弔祭冊立以其質子金士信副之十一年十一月其入朝王子金士信等遇惡風飄至楚州鹽城縣界淮南節度使李勣以聞是歲新羅飢其衆一百七十人求食於月東十五年十一月遣使朝貢長慶二年十二月遣使金柱弔朝貢寶曆元年其王子金昕來

朝大和元年四月皆遣使朝貢五年金彥昇卒以嗣子金亨徽為開府儀同三司檢校太尉使持節大都督鷄林州諸軍事兼持節玄寧海軍使新羅王景徽母朴氏為太妃妻朴氏為妃命太子左舍人兼御史中丞源寂持節弔祭冊立開成元年王子金義琮來謝因兼宿衛二年四月放還蕃賜物遣之五年四月鴻臚寺新羅國告哀王子及年滿合歸國學生等共一百五人並放還會昌元年七月訪歸國新羅官前入新羅宣慰副使前亮交州都督府司馬賜緋魚袋金雲卿可淄州長史

倭國者古倭奴國也去京師一萬四千里在新羅東南大海中依山島而居東西五月行南北三月行世與中國通其國居無城郭以木為柵以草為屋四面小島五十餘國皆附屬焉其王姓阿曇氏置一大率檢察諸國皆畏附之設官有十二等其訴訟者匍匐而地多女少男頗有文字俗敬佛法並皆跣足以幅布蔽其前後其人戴錦帽百姓皆椎髻無冠帶婦人衣純色裙長腰束髮於後佩銀花長

八寸左右各數枝以明貴賤等級衣服之制頗類新羅貞觀五年遣使獻方物太宗矜其道遠勅所司無令歲貢又遣新州刺史高表仁持節往撫之表仁無綏遠之才與王子爭禮不宣朝命而還至二十二年又附新羅奉表以通起居

日本國者倭國之別種也以其國在日邊故以日本為名或曰倭國自惡其名不雅改為日本或云日本舊小國併倭國之地其人入朝者多自矜大不以實對故中國疑焉又云其國界東西南北各數千里西界南界咸至大海東界北界有大山為限山外即毛人之國長安三年其大臣朝臣真人來貢方物朝臣真人者猶中國戶部尚書冠進德冠其項為花分而四散身服紫袍以帛為腰帶真人好讀經史解屬文容止溫雅則天宴之於麟德殿授司膳卿放還本國開元初又遣使來朝因請儒士授經詔四門助教趙玄默就鴻臚寺教之乃遣玄默闊幅布以為束修之禮題云白龜元年調布人亦疑其偽此題所得錫賚畫市文籍泛海而還其偏使朝臣仲滿慕中國之風

因留不去改姓名為朝衡仕歷左補闕儀王友衡留京師五十年好
書籍放歸鄉逗留不去天寶十二年又遣使貢上元中擢衡為左散
騎常侍鎮南都護貞元二十年遣使來朝留學生擢免勢學問僧空
海元和元年日本國使判官高階真人上言前件學生藝業稍成願
歸本國便請與臣同歸從之開成四年又遣使朝貢

唐書列傳卷第一百四十九上

唐書列傳卷第一百四十九下

北狄

鐵勒

契丹

奚

室韋

靺鞨

渤海靺鞨

靺鞨

烏羅渾

劉

昫

等修

聞人銓校刻沈桐同校

鐵勒本匈奴別種自突厥強盛鐵勒諸郡分散衆漸寡弱至武德初
有薛延陀契苾迴紇都播骨利幹多覽葛僕骨拔野古同羅渾部思
結斛薛奚結阿跌白雪等散在磧北薛延陀者自云本姓薛氏其先
擊滅延陀而有其衆因號為薛延陀部其官方兵器及風俗大抵與
突厥同初大業中西突厥處羅可汗始強大鐵勒諸部皆臣之而處
羅徵稅無度薛延陀等諸部皆怨處羅大怒誅其酋帥百餘人鐵勒
相率而叛共推契苾哥楞為易勿真莫賀可汗居貪汗山北又以薛

延陀乙失鉢為也啞小可汗居燕末山北西突厥射匱可汗強盛延陀契苾二部並去可汗之號以臣之迴紇等六部在斡督軍山者東屬于始畢之失鉢所部在金山者西臣于葉護貞觀二年葉護可汗死其國大亂乙失鉢之孫曰夷男率其部落七萬餘家附于突厥遇頡利之政衰夷男率其徒屬反攻頡利大破之於是頡利比諸姓多叛頡利歸于夷男共推為主夷男不敢當時太宗方圖頡利遣遊擊將軍喬師望從間道齎冊書拜夷男為貞珠毗伽可汗賜以鼓纛夷男大喜遣使貢方物復建牙於大漠之北斡督軍山下在京師西北六千里東至靺鞨西至葉護南接沙磧北至俱倫山迴紇拔也古阿跌同羅僕骨雷諸大部落皆屬焉三年夷男遣其弟統特勒來朝太宗厚加撫接賜以寶刀及寶鞭謂曰汝所部有大罪者鞭之夷男甚喜四年平突厥頡利之後朔塞空虛夷男率其部東返故國連庭於都尉捷山北獨邏河之南在京師北三千二百里東至室韋西至金山南至突厥北臨瀚海即古匈奴之故地勝兵二十萬立其二子為

南北部太宗亦以其強盛恐為後患十二年遣使備禮冊命拜其子皆為小可汗外示優崇實欲分其勢也會朝廷立李思摩為可汗處其部衆於漠南之地夷男心惡思摩甚不悅十五年太宗幸洛陽將有事於太山夷男謀於其國曰天子封太山萬國必會士馬皆集邊境空虚我於此時取思摩如拉朽耳因命其子大度設勒兵二十萬屯白道川據善陽嶺以擊思摩之部思摩遣使請救詔英國公李勣蒲州刺史薛萬徹率步騎數萬赴之踰白道川至青山與大度設相及追之累月至諾真永大度設知不脫乃亘十里而陳兵先是延陀擊沙鉢羅及阿史那社爾等以步戰而勝及其將來寇也先講武於國中教習步戰每五人以一人經習戰陣者使執馬而四人前戰克勝即授馬以追奔失應接罪至於死沒其家口以賞戰人至是遂行其法突厥兵先合輒退延陀乘勝而逐之勣兵拒擊而延陀萬矢俱發傷我戰馬乃令去馬步陣率長稍數百為隊齊奮以衝之其衆潰散副總管薛萬徹率數千騎收其執馬者其衆失馬莫知所從因

大縱斬首三千餘級獲馬萬五十四匹甲仗輜重不可勝計大度設跳身而遁萬徹將數百騎追之弗及其餘衆大奔走相騰踐而死者甚衆伏屍被野夷男因乞與突厥和并遣使謝罪十六年遣其叔父沙鉢羅泥敦策斤來請婚獻馬三千匹太宗謂侍臣曰北狄世為寇亂今延陀崛強須早為之所朕熟思之唯有二策選徒十萬擊而虜之滅除凶醜百年無事此一策也若遂其來請結以婚姻緩轡羈縻亦足三十年安靜此亦一策也未知何者為先司空房玄齡對曰今大亂之後瘡痍未復且兵凶戰危聖人所慎和親之策實天下幸甚太宗曰朕為蒼生父母苟可以利之豈惜一女遂許以新興公主妻之因徵夷男備親迎之禮仍發詔將幸靈州與之會夷男大悅謂其國中曰我本鐵勒之小帥也天子立我為可汗今復嫁我公主車駕親至靈州斯亦足矣於是稅諸部羊馬以為聘財或說夷男曰我薛延陀可汗與大唐天子俱一國主何有自往朝謁如或拘留悔之無及夷男曰吾聞大唐天子聖德遠被日月所照皆來賓服我歸心委質

與得觀天顏死無所恨然磧北之地必當有主捨我別求固非大國之計我志決矣勿復多言於是言者遂止太宗乃發使受其羊馬然夷男先無府藏調歛其國徃返且萬里既涉沙磧無水草羊馬多死遂後期太宗於是停幸靈州既而其聘羊馬來至所耗將半議者以為夷狄不可禮義畜若聘財未備而與之婚或輕中國當須要其備禮於是下詔絕其婚既而李思摩數遣兵侵掠之延陀復遣突利失擊思摩至定襄抄掠而去太宗遣英國公李勣援之見虜已出塞而還大宗以其數與思摩交兵重書責讓之十七年謂其使人曰語爾可汗我父子並東征高麗汝若能寇邊者但當來也夷男遣使致謝復請發兵助軍太宗答以優詔而止其冬太宗按遼東諸城破駐蹕陣而高麗莫離支潛令靺鞨誑惑夷男啗以厚利夷男氣懾不敢動俄而夷男卒太宗為之舉哀夷男少子肆乘護拔灼襲殺其兄突利失可汗而自立是為頡利俱利薛沙多彌可汗拔灼性褊急馭下無恩多所殺戮其下不附是時復以太宗尚在遼東遂發兵寇夏州將

軍執失思力擊敗之虜其衆數萬拔灼輕騎遁去尋爲迴紇所殺宗族殆盡其餘衆尚五六萬窟於西域又諸姓侯斤遞相攻擊各遣使歸命二十年太宗遣使江夏王道宗左衛大將軍阿史那社爾爲瀚海道安撫大使右領軍大將軍執失思力領突厥兵代州都督薛萬徹營州都督張儉右驍衛大將軍契苾何力各統所部兵分道並進太宗親幸靈州爲諸軍聲援既而道宗渡磧遇延陀餘衆數萬來拒戰道宗擊破之斬首千餘級萬徹又與迴紇相遇二將各遣使諭以緩懷之意其酋帥見使者皆頓顙歡呼請入朝太宗至靈州其鐵勒諸部相繼至數千人仍請列爲州縣北荒悉平詔曰惟天爲大合其德者弗違謂地蓋厚體其仁者光被故能彌綸八極輿蓋二儀振絕代之英聲畢天下之能事彼匈奴者與開闢而俱生奄有龍庭共上皇而並列僭稱驕子分天街於紫宸仰應旄頭抗大禮於皇極緬窺邃古能無力制自朕臨御天下二紀于茲粵以耿身一匡寰宇始勤勞於昧旦終致治於昇平曩者聊命偏師遂檢頡利今茲始弘廟略

已戒延陀錐麾駕出征未踰郊甸前驅所輾繞掩塞垣長策風行已振金徽之表揚威電發遠讐沙場之外鐵勒諸姓迴紇月祿俟利發等總百餘萬戶散處北溟遠遣使人委身內屬請同編列並爲州郡收其瀚海盡入提封解其辮髮並垂冠帶上變星昴歸於東井之躔下掩蹠林祛入南山之囿混元已降殊未前聞無疆之業未貽來裔古人所不能致今旣吞之前王所不能屈今咸滅之斯實書契所未有古今之壯觀豈朕一人獨能蓋由上靈儲祉錫以太康宗廟威靈成茲克定即宜備禮告于清廟仍頒示普天其後延陀西遁之衆共推夷男兄子咄摩支爲伊特勿失可汗率部落七萬餘口西歸故地乃去可汗之號遣使奉表請居鬱督軍山北詔兵部尚書崔敦禮就加緩撫而諸部鐵勒素服薛延陀之衆反咄摩支至也九姓渠帥莫不危懼朝議恐爲磧北之患復令英國公李勣進加討擊勣率九姓鐵勒二萬騎至于天山咄摩支見官軍奮至惶駭不知所爲且聞詔使蕭嗣業在迴紇中因而請降嗣業與之俱至京師詔授右武衛將

軍賜以田宅吐摩支入國後鐵勒酋帥潛知其部落仍持兩端李勣因縱兵追擊前後斬五千餘級虜男女三萬計二十二年契苾迴紇等十餘部落以薛延陀亡散殆盡乃相繼歸國太宗各因其地土擇其部落置爲州府以迴紇部爲瀚海都督府僕骨爲金徽都督府多覽葛爲燕然都督府拔野古部爲幽陵都督府同羅部爲龜林都督府思結部爲盧山都督府渾部爲臯蘭州解薛部爲高闕州奚結部爲鷄鹿州阿跌部爲鷄田州契苾部爲榆溪州思結別部爲蹄林州白霽部爲宣頰州凡一十三州拜其酋長爲都督刺史給玄金魚以爲符信又置燕然都護以統之是歲太宗以鐵勒諸部並皆內屬詔賜京城百姓大酺三日永徽元年延陀首領先逃逸者請歸國高宗更置溪彈州以安恤之至則天時突厥強盛鐵勒諸部在漠北者漸爲所併迴紇契苾思結渾部徙于甘涼二州之地其骨利幹北距大海去京師最遠自古未通中國貞觀中遣使來朝貢遣雲麾將軍康蘇密往慰撫之仍列其地爲玄闕州俄又遣使隨蘇密使入朝獻良

馬十四大宗奇其駿異爲之制名號爲十驥一曰騰霜白二曰皎雪三曰凝露四曰懸光五曰決波六曰飛霞七曰發電八曰流金九曰翔麟紫十曰奔中赤又爲文以叙其事自延陀叛後朝貢遂絕

契丹居黃水之南黃龍之北鮮卑之故地在京城東北五千三百里東與高麗鄰西與奚國接南至營州北至室韋冷陁山在其國南與奚西山相崎地方二千里逐獵往來居無常處其君長姓大賀氏勝兵四萬三千人分爲八部若有徵祭諸部皆須議合不得獨舉獵則別部戰則同行本臣突厥好與奚鬪不利則保入青山及鮮卑山其俗死者不得作塚墓以馬駕車送入大山置之樹上亦無服紀子孫死父母晨夕哭之父母死子孫不哭其餘風俗與突厥同武德初數歲邊境二年入寇平州六年其君長咄羅遣使貢名馬豐貂貞觀二年其君摩會率其部落來降突厥頡利遣使請以梁師都易契丹太宗謂曰契丹突厥本是別類今來降我何故索之師都本中國人據

我州城以爲盜竊突厥無故容納之我師往討便來救援計不久自當擒滅縱其不得終不以契丹易之太宗伐高麗至營州會其君長及老人等賜物各有差授其蕃長窟哥爲左武衛將軍二十二年窟哥等部咸請內屬乃置松漠都督府以窟哥爲左領軍將軍兼松漠都督府無極縣男賜姓李氏顯慶初又拜窟哥爲左監門大將軍其曾孫枯莫離則天時歷左衛將軍兼檢校彈汗州刺史歸順郡王又契丹有別部酋帥孫敖曹初仕隋爲金紫光祿大夫武德四年與靺鞨酋長突地稽俱遣使內附詔令於營州城傍安置授雲麾將軍行遼州總管至曾孫萬榮垂拱初累授右玉鈐衛將軍歸誠州刺史封求樂縣公萬歲通天中萬榮與王妹壻松漠都督李盡忠俱爲營州都督趙翹所侵侮二人遂舉兵殺翹據營州作亂盡忠即窟哥之胤歷位右武衛大將軍兼松漠都督則天怒其叛亂下詔改萬榮名爲萬斬盡忠爲盡滅盡滅自稱無上可汗以萬斬爲大將前鋒略地所向皆旬日兵至數萬進逼檀州詔令右金吾大將軍張玄遇左

鷹揚衛將軍曹仁師司農少卿麻仁節率兵討之與萬斬戰于西碛石谷官軍敗績玄遇仁節並爲賊所虜又令夏官尚書王孝傑左羽林將軍蘇宏暉領兵七萬以繼之與萬斬戰于東碛石谷孝傑左陣陷沒宏暉弃甲而遁萬斬乘勝率其衆入幽州殺略人吏清邊道大總管建安郡王武攸宜遣裨將討之不能尅又詔左金吾大將軍河內王武懿宗爲大總管御史大夫姜師德爲副大總管右武衛將軍沙吒忠義爲前軍總管率兵三十萬以討之俄而李盡滅死萬斬代領其衆萬斬又遣別帥駱務整何阿小爲遊軍前鋒攻陷巽州殺刺史陸寶積屠官吏子女數千人俄而奚及突厥之衆掩擊其後掠其幼弱萬斬弃其衆以輕騎數千人東走前軍副總管張九節率數百騎設伏以邀之萬斬窮蹙乃將其家奴輕騎宵遁至路河東解鞍憩於林下其奴斬之張九節傳其首于東都自是其餘衆遂降突厥開元三年其首領李失活以默啜政衰率種落內附失活即盡忠之從父弟也於是復置松漠都督府封失活爲松漠郡王拜左金吾衛大將軍

蕪松漠都督其所統八部各因舊帥拜爲刺史又以將軍薛泰督軍以鎮撫之明年失活入朝封宗室外甥女楊氏爲永樂公主以妻之六年失活死上爲之舉哀贈特進失活從父弟娑固代統其衆遣使冊立仍令襲其兄官爵娑固大臣可突于驍勇頗得衆心娑固謀欲除之可突于反攻娑固娑固奔營州都督許欽澹令薛泰帥驍勇五百人又徵奚王李大輔者及娑固合衆以討可突于官軍不利娑固大輔臨陣皆爲可突于所殺生拘薛泰營府震恐許欽澹移軍西入渝關可突于立娑固從父弟鬱于爲主俄又遣使請罪上乃令冊立鬱于令襲娑固官爵仍赦可突于之罪十年鬱于入朝請婚上又封從妹夫率更令慕容嘉賓女爲燕郡公主以妻之仍封鬱于爲松漠郡王授左金吾衛員外大將軍兼靜祈軍經略大使賜物千段鬱于還蕃可突于來朝拜左羽林將軍從幸并州明年鬱于病死弟吐于代統其衆襲兄官爵復以燕郡公主爲妻吐于與可突于復相猜阻十三年攜公主來奔便不敢還改封遼陽郡王因留宿衛可突于

立李盡忠弟邵固爲主其父車駕東巡邵固詣行在所因從至行下拜左羽林軍員外大將軍靜祈軍經略大使改封廣化郡王又封皇從外甥女陳氏爲東華公主以妻之邵固還蕃又遣可突于入朝貢方物中書侍郎李元紘不禮焉可突于怏怏而去左丞相張說謂人曰爾蕃必叛可突于人面獸心唯利是視執其國政人心附之若不優禮縻之必不來矣十八年可突于殺邵固率部落并脅奚衆降于突厥東華公主走投平盧軍於是詔中書舍人裴寬給事中薛侃等於京城及關內河東河南河北分道募壯勇之士以忠王浚爲河北道行軍元帥以討之師竟不行二十年詔禮部尚書信安王禕爲行軍副大總管領衆與幽州長史趙含章出塞擊破之俘獲甚衆可突于率其麾下遠遁奚衆盡降禕乃班師明年可突于又來抄掠幽州長史薛楚王遣副將郭英傑吳克勤鄔知義羅守忠率精騎萬人并領降奚之衆追擊之軍至渝關都山之下可突于領突厥兵以拒官軍奚衆遂持兩端散走保險官軍大敗知義守忠率麾下遁歸英傑

克勤沒于陣其下六千餘人盡為賊所殺詔以張守珪為幽州長史
兼御史中丞以經略之可突干漸為守珪所逼遣使偽降俄又迴惑
不定引衆漸向西北將就突厥守珪遣管紀王悔等就部落招諭之
時契丹衙官李過折與可突干分掌兵馬情不叶每潛誘之過折夜
勒兵斬可突干及其支黨數十人二十三年正月傳首東都詔封過
折為北平郡王授特進檢校松漠州都督賜錦衣一副銀器十事絹
綵三千疋其年過折為可突干餘黨泥禮所殺并其諸子唯一子刺
訖走投安東得免拜左驍衛將軍天寶十年安祿山誣其酋長欲叛
請舉兵討之八月以幽州雲中平盧之衆數萬人就黃水南契丹衙
官之戰祿山大敗而還死者數千人至十二年又降附迄于貞元常
年歲來修藩禮貞元四年與奚衆同寇我振武大掠人畜而去九年
十年復遣使來朝大首領洛拽何巴下各授官放還十一年大首
領執蘇等二十五人來朝自後至元和長慶寶曆大和開成時遣使
來朝貢會昌三年九月制契丹新立五屈戌可雲麾將軍守右武衛

將軍員外置同正員幽州節度使張仲武上言屈戌等云契丹舊用
迴紇印今懇請聞奏乞國家賜印克之以奉國契丹之印為文
奚國蓋匈奴之別種也所居亦鮮卑故地即東胡之界也在京師東
北四千餘里東接契丹西至突厥南拒白狼河北至靺鞨國自營州西
北饒樂水以至其國勝兵三萬餘人分為五部每部置俟斤一人風
俗並於突厥每隨逐水草以畜牧為業遷徙無常居有氍帳兼用車
為營牙中常五百人持兵自衛此外部落皆散居山谷無賦稅其人
善射獵好與契丹戰爭武德中遣使朝貢貞觀二十二年酋長可度
者率其所部內屬乃置饒樂都督府以可度考為右領軍兼饒樂都
督封樓煩縣公賜姓李氏顯慶初又授右監門大將軍萬歲通天年
契丹叛後奚衆官屬突厥兩國常遞為表裏號曰兩蕃景雲元年其
首領李大輔遣使貢方物睿宗嘉之宴賜甚厚延和元年左羽林將
軍檢校幽州大都督孫儉率兵十二萬以襲其部落師次冷硯前軍
左驍衛將軍李措洛等與大輔會戰我師敗績儉懼不敢進救遣使

矯報大輔云我奉勅來此招諭其蕃將李措洛等不受節度而輒用
兵請斬以謝大輔曰若奉勅招諭有何國信物儉率軍中繒帛萬餘
段并袍帶以與之大輔曰將軍可南還無相驚擾儉軍斬失部伍大
輔乃率衆逼之由是大敗兵士死傷者數萬儉及副將周以悌為大
輔所擒送于突厥默啜並遇害開元三年大輔遣其大臣粵蘇梅落
來請降詔復立其地為饒樂州封大輔為饒樂郡王仍拜左金吾員
外大將軍饒樂州都督五年大輔與契丹首領松漠郡王李失活歲
請於柳城依舊置營州都督府上從之勅太子詹事羊師度克使督
作役功八千餘人其年大輔入朝詔封從外甥女辛氏為固安公主
以妻之賜物一千五百疋遣右領軍將軍李濟持節送還蕃八年大
輔率兵救契丹戰死其弟魯蘇嗣立十年入朝詔令襲其兄饒樂郡
王右金吾員外大將軍兼保塞軍經略大使賜物一千段仍以固安
公主為妻而公主與嫡母未和遞相論告詔令離婚復以成安公主
之女韋氏為東光公主以妻之十四年又改封魯蘇為奉誠王授右

羽林軍員外將軍十八年奚衆為契丹衙官可突干所脅復叛降
厥魯蘇不能制走投渝關東光公主奔歸平盧軍其秋幽州長史趙
含章發清夷軍兵擊奚破之斬首三百級自是奚衆稍稍歸降二十
年信安王禮奉詔討叛奚奚酋長李詩瑄高等以其部落五千帳來
降詔封李詩為歸義王燕特進左羽林軍大將軍同正仍克歸義州
都督賜物十萬段移其部落於幽州界安置天寶五載又封其王娑
固為昭信王仍授饒樂都督自大曆後朝貢時至貞元四年七月奚
及室韋寇振武十一年四月幽州奏卻奚六萬餘衆元和元年其王
饒樂府都督龔歸誠王梅落來朝加檢校司空放還蕃三年以奚首
領索低為右武威衛將軍同正克檀訥兩州遊奕兵馬使仍賜姓李
氏八年遣使來朝十一年遣使獻名馬爾後每歲朝貢不絕或歲中
二三至故事常以范陽節度使為押奚契丹兩蕃使自至德之後蕃
臣多擅封壤朝廷優容之彼務自完不生邊事故二蕃亦少為寇其
每歲朝賀常各遣數百人至幽州則選其酋渠三五十人赴闕引見

於麟德殿錫以金帛遣還餘皆駐而館之率爲常也

室韋者突冊之別類也居徇越河北其國在京師東北七千里東至

黑水靺鞨西至突厥南接契丹北至于海其國無君長有六首領十

七人並號莫賀弗世管攝之而附于突厥兵器有角弓楛矢尤善射

時聚弋獵事畢而散其人士著無賦歛或爲小室以皮覆上相聚而

居至數十百家刻木爲犁不加金刃人牽以種不解用牛夏多霧雨

冬多霜霰畜宜犬豕豢養而噉之其皮用以爲韋男子女人通以爲

服被髮左衽其家富者項著五色雜珠婚嫁之法男先就女舍三年

後力因得親迎其婦從日已滿女家分其財物夫婦同車而載鼓舞

共歸武德中獻方物貞觀三年遣使貢豐貂自此朝貢不絕又云室

韋我唐有九部焉所謂嶺西室韋山北室韋黃頭室韋大如者室韋

小如者室韋婆高烏弋反室韋訥北室韋駱駝室韋並在柳城郡之東北

近者二千五百里遠者六千二百里今室韋最西與迴紇接界者烏

素固部落當俱輸泊之西南次東有移塞沒部落次東又有寒島之

部落此部落有良馬人立亦多居斡河之南其河彼俗謂之燕支河

次又有和斛部落次東又有烏羅護部落又有那禮部落又東北有

山北室韋又北有小如者室韋又北有婆高至韋東又有嶺西室韋

又東南至黃頭室韋此部落兵強人戶亦多東北與達姑接嶺西室

韋北又有訥比之室韋此部落校小烏羅護之東北二百餘里那河

之北有古烏九之遺人今亦自稱烏九國武德貞觀中亦遣使來朝

貢其北大山之北有大室韋部落其部落傍望建河居其河源出突

厥東北界俱輸泊屈曲東流經西室韋界又東經大室韋界又東經

蒙兀室韋之北落組室韋之南又東流與那河忽汗河合又東經南

黑水靺鞨之北北黑水靺鞨之南東流注于海烏九東南三百里又

有東室韋部落在徇越河之北其河東南流與那河合開元天寶間

比年或間歲入貢大曆中亦頻遣使來貢貞元八年閏十二月室韋

都督和斛熱素等一十人來朝大和五年至八年凡三遣使來九年

十二月室韋大勝督阿成等三十人來朝開成會昌中亦遣使來朝

貢不絕

靺鞨蓋肅慎之地後魏謂之勿吉在京師東北六千餘里東至於海西接突厥南界高麗北鄰室韋其國凡爲數十部各有酋帥或附於高麗或臣於突厥而黑水靺鞨最處北方尤稱勁健每恃其勇恒爲鄰境之患俗皆編髮性凶悍無憂戚貴壯而賤老無屋宇並依山水掘地爲穴架木於上以土覆之狀如中國之塚墓相聚而居夏則出隨水草冬則入處穴中父子相承世爲君長俗無文字兵器有角弓及楛矢其畜宜楮富人至數百口食其肉而衣其皮死者穿地埋之以身襯土無棺歛之具殺所乘馬於屍前設祭有酋帥突地稽者隋末率其部千餘家內屬處之於營州煬帝授突地稽金紫光祿大夫遼西太守武德初遣間使朝貢以其部落置燕州仍以突地稽爲總管劉黑闥之叛也突地稽率所部赴定州遣使詣太宗請受節度以戰功封著國公又徙其部落於幽州之昌平城會高開道引突厥來攻幽州突地稽率兵邀擊大破之貞觀初拜右衛將軍賜姓李氏尋

鳥猶如此況人情乎但愍其遠來必思親戚宜付使者聽遣還家是歲貞平卒無子立其女善德爲王宗室大臣乙祭總知國政詔贈貞平左光祿大夫贈物二百段九年遣使持節冊命善德柱國封樂浪郡王新羅王十七年遣使上言高麗百濟累相攻襲亡失數十城兩國連兵意在滅臣社稷謹遣陪臣歸命大國乞偏師救助太宗遣相里玄奘齎書賜高麗曰新羅委命國家不闕朝獻爾與百濟宜即戢兵若更攻之明年當出師擊爾國矣太宗將親伐高麗詔新羅募集士馬應接大軍新羅遣大臣領兵五萬人入高麗南界攻水口城降之二十一年善德卒贈光祿大夫餘官封並如故因立其妹貞德爲王加授柱國封樂浪郡王二十二年貞德遣其弟國相伊贊于金春秋及其子文正來朝詔授春秋爲特進文正爲左武衛將軍春秋請詣國學觀釋奠及講論太宗因賜以所制溫湯及晉祠碑并新撰晉書將歸國令三品已上宴餞之優禮甚稱永徽元年貞德大破百濟之衆遣其弟法敏以聞貞德乃織錦作五言太平頌以獻之其詞

曰大唐開洪業巍巍皇猷昌止戈戎衣定修文繼百王統天崇雨施
理物體含章深仁偕日月撫運邁陶唐幡旗既赫赫鉦鼓何鏗鏘外
夷違命者翦覆被天殃淳風疑幽顯遐邇競呈祥四時和王燭十曜
巡萬方維岳降宰輔維帝任忠良五三成一德昭我唐家光帝嘉之
拜法敏為太府卿五年貞德卒為舉哀詔以春秋嗣立為新羅王加
授開府儀同三司封樂浪郡王六年百濟與高麗毳鞞率兵侵其北
界攻陷三十餘城春秋遣使上表求救顯慶五年命左武衛大將軍
蘇定方為熊津道大總管統水陸十萬仍令春秋為岨夷道行軍總
管與定方計平百濟俘其王扶餘義慈獻于闕下自是新羅漸有高
麗百濟之地其界益大西至于海龍胡元年春秋卒詔其子太府卿
法敏嗣位為開府儀同三司上柱國樂浪郡王新羅王三年詔以其
國為鷄林州都督府授法敏為鷄林州都督法敏以開耀元年卒其
子政明嗣位垂拱二年政明遣使來朝因上表請唐禮一部并雜文
章則天令所司寫吉凶要禮并於文館詞林採其詞涉規誡者勿取

子桂婁郡王大武藝襲父為左驍衛大將軍渤海郡王忽汗州都督
十四年黑水靺鞨遣使來朝詔以其地為黑水州仍置長史遣使鎮
押武藝謂其屬曰黑水途經我境始今與唐家相通舊請突厥吐屯
皆即知同去今不計會即請漢官必是與唐家通謀腹背攻我也遣
毋弟大門藝及其舅任雅發兵以擊黑水門藝曾克質子至京師開
元初還國至是謂武藝曰黑水請唐官吏即欲擊之是背唐也唐
國人衆兵強萬倍於我一朝結怨但自取滅亡昔高麗全盛之時強
兵三十餘萬抗敵唐家不事賓伏唐兵一臨掃地俱盡今日渤海之
衆數倍少於高麗乃欲違背唐家事必不可武藝不從門藝欲殺之門
又上書固諫武藝怒遣從兄大壹夏代門藝統兵徵門藝欲殺之門
藝遂奔其衆間道來奔詔授左驍衛將軍武藝尋遣使朝貢仍上表
極言門藝罪狀請殺之上密遣門藝往安西仍報武藝云門藝遠來
歸投義不可殺今流向嶺南已遣去訖乃留其使馬文軌葱勿雅別
遣使報之俄有洩其事者武藝又上書云大國示人以信豈有欺誑

之理今聞門藝不向嶺南伏請依前殺却由是鴻臚少卿李道邃源復以不能督察官屬致有漏洩左遷道邃為曹州刺史復為澤州刺史遣門藝暫向嶺南以報之二十年武藝遣其將張文休率海賊攻登州刺史韋俊詔遣門藝往幽州徵兵以討之仍令太僕員外卿金思蘭往新羅發兵以攻其南境屬山阻寒凍雪深文餘兵士死者過半竟無功而還武藝懷怨不已密遣使至東都假刺客刺門藝於天津橋南門藝格之不死詔河南府捕獲其賊盡殺之二十五年武藝病卒其子欽茂嗣立詔遣內侍段守簡往冊欽茂為渤海郡王仍嗣其父為左驍衛大將軍忽汗州都督欽茂承詔赦其境內遣使隨守簡入朝貢獻大曆二年至十年或頻遣使來朝或間歲而至或歲內二三至者十二年正月遣使獻日本國舞女一十一人及方物四月十二月使復來建中三年五月貞元七年正月皆遣使來朝授其使大常靖為衛卿尉同正令還蕃八月其王子大貞翰來朝請備宿衛十年正月以來朝王子大清允為右衛將軍同正其下三十餘人拜

官有差十一年二月遣內常侍殷志贍冊大嵩璘為渤海郡王十四年加銀青光祿大夫檢校司空進封渤海郡王嵩璘父欽茂開元中襲父位為郡王左舍吾大將軍天寶中累加特進太子詹事賓客寶應元年進封國王大曆中累加拜司空大尉及嵩璘襲位但授其郡王將軍而已嵩璘遣使敘理故再加冊命十一月以王姪大能信為左驍衛中郎將虞候婁蕃長都督茹富仇為右武衛將軍放還二十一年遣使來朝順宗加嵩璘金紫光祿大夫檢校司空元和元年十月加檢校太尉十二月遣使朝貢四年以嵩璘男元瑜為銀青光祿大夫檢校秘書監忽汗州都督依前渤海國王五年遣使朝貢者二七年亦遣使來朝八年正月授元瑜弟權知國務言義銀青光祿大夫檢校秘書監都督渤海國王遣內侍李重旻使焉十三年遣使來朝且告哀五月以知國務大仁秀為銀青光祿大夫檢校秘書監都督渤海國王十五年閏正月遣使來朝加大仁秀金紫光祿大夫檢校司空十二月復遣使來朝貢長慶二年正月又遣使來朝四年二月

大窾等五人來朝請備宿衛寶曆中比歲修貢大和元年四月皆遣使來朝五年大仁秀卒以權知國務大彝震為銀青光祿大夫檢校祕書監都督渤海國王六年遣王子大明俊等來朝七年正月遣同中書右平章事高寶英來謝冊命仍遣學生三人隨寶英請赴上都學問先遣學生三人事業稍成請歸本國許之二月王子大先晟等六人來朝開成後亦修職貢不絕
雷匈奴之別種也居于潢水北亦鮮卑之故地其國在京師東北五千里東接靺鞨西至突厥南至契丹北與烏羅渾接地周二千里四面有山環繞其境人多善射獵好以赤皮為衣緣婦人貴銅釧衣襟上下懸小銅鈴風俗畧與契丹同有都倫紇斤部落四萬戶勝兵萬餘人貞觀三年其君長遣使貢方物
烏羅渾國蓋後魏之烏洛侯也今亦謂之烏羅護其國在京師東北六千三百里東與靺鞨西與突厥南與契丹北與烏九接風俗與靺鞨同貞觀六年其君長遣使獻貂皮焉

史臣曰北狄密邇中華信邊蓋有之矣東夷隔礙瀛海作梗罕常聞之非惟勢使之然抑亦稟於天性太平之人仁空峒之人武信矣隋煬帝縱欲無厭興兵遼左急歛暴欲由是而起亂臣賊子得以為資不戢自焚遂亡其國我太宗文皇帝親馭戎輅東征高麗雖有成功所損亦甚及凱還之日顧謂左右曰使朕有魏徵在必無此行矣則是悔於出師也可知矣何者夷狄之國猶石田也得之無益失之何傷必務求虛名以勞有用但當修文德以來之被聲教以服之擇信臣以撫之謹邊備以防之使重譯來庭航海入貢茲庶得其道也贊曰東夷之人北狄之俗爰考周官是稱蠻服未得無傷已得何足宜務懷柔謂之羈束

唐書列傳卷第一百五十一

安祿山子慶緒

史思明朝義

高尚

孫孝哲

劉

响

等修

聞人詮校刻沈桐同校

安祿山營州柳城雜種胡人也本無姓氏名軋犖山毋阿史德氏亦突厥巫師以卜為業突厥呼鬪戰為軋犖山遂以名之少孤隨母在突厥中將軍安波至兄延偃妻其母開元初與將軍安道買男俱逃出突厥中道買次男貞節為嵐州別駕收獲之年十餘歲以與其兄及延偃相携而出感媿之約與思順等並為兄弟冒姓為安及長解六蕃語為互市牙郎二十年張守珪為幽州節度祿山盜羊事覺守珪剝坐欲棒殺之大呼曰大夫不欲滅兩蕃耶何為打殺祿山守珪見其肥白壯其言而釋之令與鄉人史思明同捉生行必剋獲拔為偏將常嫌其肥以守珪威風素高畏懼不敢飽食以驍勇聞遂養為

唐書一百五十一

子二十八年爲平盧兵馬使性巧黠人多譽之授營州都督平盧軍使厚賂往來者乞爲好言玄宗益信嚮之天寶元年以平盧爲節度以祿山攝中丞爲使入朝奏事玄宗益寵之三載代裴寬爲范陽節度河北採訪平盧軍等使如故採訪使張利貞常受其賂數載之後黜陟使度建侯又言其公直無私裴寬受代及李林甫順旨並言其美數公皆信臣玄宗意益堅不搖矣後請爲貴妃養兒入對皆先拜太真玄宗怪而問之對曰臣是蕃人蕃人先母而後父玄宗大悅遂命楊銛已下並約爲兄弟姊妹六載加大夫常令劉駱谷奏事與王鉞俱爲大夫李林甫爲相朝臣莫敢抗禮祿山承恩深入謁不甚整折林甫命王鉞鉞趨拜謹甚祿山悚息馨漸曲每與語皆揣知其情而先言之祿山以爲神明每見林甫雖盛冬亦汗洽林甫接以溫言中書聽引坐以已披袍覆之祿山欣荷無所隱呼爲十郎駱谷奏事先問十郎何言有好言則喜躍若但言大夫須好檢校則反手據牀曰阿與我死也李龜年嘗數其說玄宗以爲笑樂晚年益肥壯腹垂

過膝重三百三十斤每行以肩膊左右擡挽其身方能移步至玄宗前作胡旋舞疾如風焉爲置第宇窮極壯麗以金銀爲笏筐篋籬等上御勤政樓於御坐東爲設一大金雞障前置一榻坐之卷去其簾十載入朝又求爲河東節度因拜之男十一人長子慶宗大僕卿少子慶緒鴻臚卿慶宗又尚郡主祿山陰有逆謀於范陽北築雄武城外示禦寇內貯兵器積穀爲保守之計戰馬萬五千匹牛羊稱是兼三道節度進奏無不允引張通儒李庭堅平冽李史魚獨孤問俗在幕下高尚堂書記劉駱谷留居西京爲耳目安守忠李暉仁蔡希德牛庭珩向潤容崔乾祐尹子奇何千年武令珣能元皓田承嗣田乾真皆拔於行間每月進奉生口駝馬鷹犬不絕人無聊矣旣肥大不任戰前後十餘度欺誘契丹宴設酒中著葺若子預掘一坑待其昏醉斬首埋之皆不覺死每度數十人十一載八月祿山併率河東等軍五六萬號十五萬以討契丹去平盧千餘里至土護真河卽北黃河也又倍程三百里奄至契丹牙帳屬久雨弓箭皆漲濕將士困極

奚又夾攻之殺傷略盡祿山被射折其玉簪以麾下奚小兒二十餘人走上山墜坑中其男慶緒等扶持之會夜解走投平盧城楊國忠屢奏祿山必反十二載玄宗使中官輔瑒琳覘之得其賄賂盛言其忠國忠又云召必不至洎召之而至十三載正月謁於華清宮因涕泣言臣蕃人不識字陛下擢臣不次被揚國忠欲得殺臣玄宗益親厚之遂以為左僕射却迴其月又請為開厩隴右群牧等都使奏吉溫為武部侍郎兼中丞為其副又請知摠監事既為開厩群牧等使上筋脚馬皆陰選擇之奪得樓煩監牧及奪張文儼馬牧三月一日歸范陽疾行出關日行三四百里至范陽人言反者玄宗必大怒縛送與之十四載玄宗又召之託疾不至賜其子婚令就觀禮又辭十一月反于范陽矯稱奉恩命以兵討逆賊楊國忠以諸蕃馬步十五萬夜半行平明食日六十里以高尚嚴莊為謀主孫孝哲高邈何千年為腹心天下承平日久人不知戰聞其兵起朝廷震驚禁衛皆市井商販之人乃開左端道出錦帛召募因以高仙芝封常清等相次

為大將以擊之祿山令嚴肅得士死力無不一當百遇之必敗十二月渡河至陳留郡河南節度張介然城陷死之傳首河北陳留郭門祿山男慶緒見誅慶宗傍泣告祿山祿山在輦中驚哭曰吾子何罪而殺之狂而怒官軍之降者夾道命交相斫焉死者六七千人遂入陳留郡太守郭納初拒戰至是出降至滎陽太守崔無詵拒戰城陷死之次于泥水鬻子谷將軍荔非守瑜蹲而射之殺數百人及鐵驛子祿山不敢過乃取谷南而過守瑜箭盡投河而死東京留守李澄中承盧奕使採訪判官蔣清虜紀河陽橋祿山怒率軍大至封常清自死西墮牆使伐對寒路而奔祿山入東京殺李澄盧奕蔣清召河南尹達奚珣使之蒞事初常清欲殺珣恐應賊愷奔諫止之常清既敗唯與數騎走至陝郡高仙芝率兵守陝城皆弃甲西走潼關俱賊追躡相蹂藉而死者塞路陝郡太守竇庭芝走投河東賊使崔乾祐守陝郡臨汝太守韋斌降于賊十五年正月賊竊號燕國立年聖武達奚珣已下署為丞相五月南陽節度魯吳率荆襄黔中嶺南子弟

十餘與賊將武令珣戰于葉縣城北汝河王師盡沒六月李光弼
郭子儀出上門路大破賊衆於常山郡東嘉山河北諸郡歸降者十
餘祿山窘急圖欲却投范陽會哥舒翰自潼關領馬步八萬與賊將
崔乾祐戰于靈寶西爲賊覆敗翰西奔潼關爲其帳下執送于賊關
門不守玄宗幸蜀太子收兵靈武賊乃遣張通儒爲西京留守田乾
真爲京兆尹安守忠屯兵苑中十一月遣阿史那承慶攻陷潁川屠
之祿山以體肥長帶瘡及造逆後而眼漸昏至是不見物又著疽疾
俄及至德二年正月朔受朝瘡甚而中罷以疾加躁急動用斧鉞嚴
莊亦被捶撻莊乃日夜謀之立慶緒於戶外莊持刀領豎李豬兒同
入祿山帳內豬兒以大刀斫其腹祿山眼無所見牀頭常有一刀及
覺難作捫牀頭不得但撼握帳大呼曰是我家賊腹腸已數斗流在
牀上言訖氣絕因掘牀下深數尺爲坑以氈繭包其屍埋之又無哭
泣之儀莊即言於外言祿山傳位於晉王慶緒尊祿山爲太上皇
猶縱樂飲酒無度呼莊爲兄事之大小必咨之初豬兒出契丹部

落十數歲事祿山甚黠慧祿山持刃盡去其勢血流數升欲死祿山
以灰火傳之盡日而蘇因爲閹人祿山頗寵之最見信用祿山肚大
每著衣帶三四人助之兩人擡起肚豬兒以頭戴之始取裙褲帶及
繫褱帶玄宗寵祿山賜華清宮湯浴皆許豬兒等人助解著衣服然
終見剝者豬兒也

慶緒祿山第二子也母康氏祿山糟糠之妻慶緒善騎射祿山偏愛
之未二十拜鴻臚卿兼廣陽太守初名仁執玄宗賜名慶緒爲祿山
都知兵馬使嚴莊高尚立爲僞主慶緒素懦弱言詞無序莊恐衆不
伏不令見人莊爲僞御史大夫馮翊郡王以專其政厚其軍將官秩
以固其心二月肅宗南幸鳳翔郡始知祿山死使僕固懷恩使于迴
紇結婚請兵討逆其月郭子儀拔河東郡崔乾祐南遁八月迴紇三
千騎至九月廣平王領蕃漢之衆收西京走安守忠賊之死者積如
山皇十月賊將尹子奇攻陷睢陽郡殺張巡姚閻等王師乘勝至陝
郡賊懼令嚴莊傾其驍勇而夾拒廣平王遣副元帥郭子儀等與賊

戰于陝西曲沃大破之於新店逐北二十里斬首十餘萬伏屍三十里嚴莊奔至東京告慶緒慶緒率其餘衆奔河北保鄴郡嚴莊至河內南來歸順賊將阿史那承慶等麾下三萬餘人悉奔恒趙范陽從慶緒者唯疲卒一千三百而已僞中書令張通儒秉政改相州爲成安府署置百官旬日之內賊將各以衆至者六萬餘兇威復振僞青齊節度能元皓獨率衆歸順明年改乾元元年僞德州刺史王暕貝州刺史宇文寬等皆歸順河北諸軍各以城守累月賊使蔡希德安太清急擊復陷于賊虜之以歸齧食其肉其下潛謀歸順者衆矣賊皆易置之以縱屠戮人心始離又不親政事繕治亭沼樓船爲長夜之飲高尚等各不相叶蔡希德兵最銳性剛直張通儒譖而縊殺之三軍冤痛不爲用以崔乾祐爲天下兵馬使權領中外兵乾祐性復戾士卒不附九月肅宗遣郭子儀等九節度率步騎二十萬攻之以魚朝恩爲軍容使初子儀之列陣也使善射者三千人伏於壘垣內明日接戰子儀麾其屬僞奔慶緒逐之伏者齊發賊黨大潰使薛嵩

求救於史思明言禪讓之禮思明先遣李歸仁以步卒一萬馬軍三千先往滏陽以應及至滏陽子儀之圍已固築城穿壕各三重樓櫓之盛古所未有又引水以灌城下城中水泉大上井皆滿溢以安太清代乾祐爲都知兵馬使思明南攻魏州節度使崔光遠南走思明據其城數日即乾元二年正月一日也思明僞稱燕王立年號慶緒自十月被圍至二月城中人相食米斗錢七萬餘鼠一頭直數千馬食墮牆麥麩及馬糞濯而飼之思明引衆來救三月六日子儀等戰敗遂解圍而南斷河陽橋以守穀水思明領其衆營於鄴縣南慶緒使收子儀等營中糧尚六七萬石復與孫孝哲乾祐謀閉門自守議更拒思明諸將曰今日安可更背史王乎張通儒高尚平列謂慶緒曰史王遠來臣等皆合迎謝對曰任公暫往見思明思明與之涕泗厚其禮復命歸城經三日慶緒不至思明密召安太清令誘之慶緒不獲已以三百騎詣思明思明引入令三軍擐甲執兵待之及諸弟領至于庭再拜稽首曰臣不克負荷弃失兩都久陷重圍不意大王

以太上皇故將兵遠救思明曰弃失兩都用兵不利亦何事也爾爲人子殺汝父以求位庸非大逆乎吾爲太上皇討賊卽牽出并其四弟及高尚孫孝哲崔乾祐皆縊殺之祿山父子僭逆三年而滅初王師之圍相州也意朝夕屠陷唯術士桑道茂曰三月六日西師必散此城無憂卒如其言

高尚幽州雍奴人也本名不危母老乞食於人尚周遊不歸侍養寓居河朔縣界於令孤潮鄭里通其婢生一女遂收之尚頗篤學瞻文詞嘗嘆息謂汝南周銑曰高不危寧當舉事而死終不能咬草根以求活耳縣尉有姓高者以其宗盟引置門下遂以尚入籍爲兄弟李齊物爲懷州刺史舉高尚不仕送京師并助錢三萬齊物寓書於中官將軍吳懷實以託之懷實引見高力士置賓館中令與男丞相錫爲學無問家事一以委之無何令妻父呂令皓特表薦之天寶元年拜左領軍倉曹參軍司正負六載安祿山奏爲平盧掌書記出入祿山臥內祿山肥多睡尚執筆在旁或通宵焉繇是浸親厚之遂與祿

山解圖讖勸其反天寶十一年祿山表爲屯田員外郎及隨祿山寇陷東京僞授中書侍郎僞赦書制勅多出其手始尚與嚴莊孫孝哲計畫白祿山以爲事必成及顏杲卿殺李欽湊於土門揚聲言榮王琬哥舒翰二十萬衆徇河北十七郡皆歸順顏真卿破袁知奉三萬衆於堂邑賀蘭進明再拔信都李光弼郭子儀繼收常山趙郡河北路絕者再河南諸郡皆有防禦潼關有哥舒翰之師祿山大懼怒尚等曰汝元向我道萬全必無所畏今四邊若此賴鄭汴數州尚存向西至關一步不通河北並已無矣萬全何在更不須見我尚等遂數日不得見祿山憂悶不知所爲會田乾真自潼關至曉諭祿山曰自古帝王皆有勝敗然後成大事豈有一舉而得之者乎今四邊兵馬雖多皆非精銳豈我之比縱事不成收取數萬衆橫行天下爲一盜跡亦十年五歲矣豈有人能制我耶尚莊等皆佐命元勳何得隔絕不與相見令其憂懼只此數人豈不能爲患乎外間聞之必心搖動祿山喜曰阿浩非汝誰能開豁我心裏事今無憂矣爲之奈何乾真

曰不如喚取慰勞之遂召尚等飲宴作樂祿山自唱歌以送酒待之
如初阿浩乾真小字也及慶緒至相州偽授侍中

孫孝哲契丹人也母偽祿山所通因得狎近及祿山僭逆為授殿中
監開廐使封王孝哲尤用事亞於嚴莊表馬華侈頗事豪貴每食皆
備珍饌性殘忍果於殺戮聞者畏之祿山使孝哲與張通儒同守西
京妃王宗枝皆罹其酷與嚴莊爭權不睦及祿山死奪其使以鄧季
陽代之慶緒之奔莊俱為所圖因而來奔思思明本名宰于營州寧
夷州突厥雜種胡人也姿瘦少鬚髮為肩偃背齧目側鼻性急躁與
安祿山同鄉里先祿山一日生思明除日生祿山歲日主及長相善
俱以驍勇聞初事特進烏知義每令騎覘賊必生擒以歸又解六蕃
語與祿山同為互市郎張守珪為幽州節度奏為折衝天寶初頗立
戰功至將軍知平盧軍事嘗入奏玄宗賜坐與語甚奇之問其年曰
四十矣玄宗撫其背曰卿貴在後勉之遷大將軍北平太守十一載
祿山奏授平盧節度都知兵馬使十四載安祿山反命思明討饒陽

等諸郡陷之十五載正月六日思

明與蔡希德圍顏杲卿於常山九

日拔之又圍饒陽二十九日不能

以李光弼出土門拔常山郡思明

解圍而拒光弼光弼列兵於城南

以持累月光弼草盡使精卒以車

數乘於旁縣取草輒被擊之其後

以謀歸順為副留守向潤容所殺

以飼之初祿山以賈循為范陽留

以容代其任四月朔方節度郭子

儀以朔方蕃漢二萬人自土門而

常山軍威遂振南拔趙郡思明

退保博陵五月十日子儀光弼擊

以敗思明於沙河上又攻之思明

以騎卒奔嘉山光弼擊之思明大

走入博陵郡光弼圍之城幾拔

雋潼關失守肅宗理兵于朔方使

中官邢延恩追朔方河東兵馬光

弼入土門思明隨後激擊之已而

迴軍併行擊劉正臣正臣易之初

不設備遂奔軍保北平正臣妻子

及軍資二千乘盡沒思明將卒願

精銳皆平盧戰士南拔常山趙郡

又攻河間為尹子奇所圍已四十

餘日顏真卿使和琳以一萬二千

人馬百匹以救之至河間二十餘

餘日顏真卿使和琳以一萬二千

人馬百匹以救之至河間二十餘

里北風勁烈鼓聲不相聞賊縱擊之搗和琳以至城下思明既至合
勢賊軍益盛李奐為賊所擒送東京又攻景城擒李暉暉投河而死
遂使康及野波攻平原真卿覺之兵馬既盡渡河而南攻清河糧盡
城陷擒太守王懷忠以獻祿山將軍壯嗣賢圍烏承恩於信都承恩
母妻先為安祿山所獲思明獲其男代則使諭承恩承恩遂降思明
與之把臂飲酒饒陽陷李系投火死河北悉陷尹子奇以五萬衆渡
河至青州欲便向江淮會迴紇二千騎奄至范陽范陽閉門二日然
後向太原子奇行千里以救之二年正月思明以蔡希德合范陽上
黨兵馬十萬圍李光弼於太原光弼以爲地道至城陣前驍賊方戲
弄城中人地道中人出擒之敵以爲神呼爲地藏菩薩思明留十月
會安祿山死慶緒令歸范陽希德留三日餘日皆不能拔而歸自祿山
陷兩京常以駱駝運兩京御府珍寶以范陽不知紀極由是恣其逆
匪思明轉驕不用慶緒之命安慶緒遣王師所敗投鄴郡其下蕃漢
兵三萬人初不知所從思明擊殺二千人然後降之慶緒使阿史那

承慶安守忠徵兵於思明且欲圖之判官耿仁智忠謀之士謂思明
曰大夫崇重人不敢言仁智請一言而死思明曰試言之對曰大夫
久事祿山祿山兵權若此誰敢不服如大夫比者逼於兇威耳固亦
無罪今聞孝感皇帝聰明勇智有少康周宣之略大夫發使輸誠必
開懷見納此轉禍爲福之上策也思明曰善承慶等以五千騎至范
陽思明悉衆介胄以逆之衆且數萬去之一里使謂之曰相公及王
遠至將士等不勝喜躍此皆邊兵怯懦頗懼相公之來莫敢進也請
弛弓以安之從之思明遂以承慶守忠入內廳飲樂之別令諸將於
其所分收其甲仗其諸郡兵皆給糧恣歸之欲留者分隸諸營遂拘
承慶斬守忠李立節之首李光弼使衙官敬俛招之遂令衙官竇子
昂奉表以所管兵衆八萬人及以僞河東節度高秀巖來降肅宗大
悅封歸義王范陽長史御史大夫河北節度使朝義已下并爲列卿
秀巖雲中大守以其男如岳等七人爲大官使內侍李思敬將軍烏
承恩宣慰使令討殘賊明年改乾元元年四月肅宗使烏承恩爲副

使候伺其過而殺之初承恩父知義爲節度思明常事知義亦有開
獎之恩以此李光弼冀其無疑因謀殺之承恩至范陽數漏其情夜
取婦人衣詣諸將家以翻動之意諭之諸將以白思明甚懼無以爲
驗有頃承恩與思敬從上京來宣恩命畢將歸私第思明留承恩且
於館中明當有所議已令婢其所寢之牀伏二人于其下承恩有小
男先留范陽思明令省其父夜後私於其子曰吾受命除此逆明便
授吾節度矣牀下二人叫呼而出以告思明思明令執之搜其衣囊
得朝廷所與阿史那承慶鐵券及光弼與承恩之牒云承慶事了卽
付鐵券不了不可付之又得簿書數百紙皆載先所從反軍將名思
明語之曰我何負於汝而至是耶承恩稱死罪此太尉光弼之謀也
思明集軍將官吏百姓西向大哭曰臣以十三州之地十萬衆之兵
降國家赤心不負陛下何至殺臣因榜殺承恩父子囚李思敬遣使
表其事朝廷又令中使慰諭云國家與光弼無此事乃承恩所爲殺
之善也又有使從京至執三司議罪人狀思明曰陳希烈已下皆重

臣上皇弃之幸蜀旣收復天下此輩當慰勞之今尚見殺况我本從
祿山反乎諸將皆云烏承恩之前事情狀可知光弼尚在憂不細也
大夫何不取諸將狀以誅光弼以謝河北百姓主上若不惜光弼爲
大夫誅之大夫乃安不然爲患未已思明日公等言是乃令耿仁智
張不矜修表請誅光弼以謝河北若不從臣請臣則自領兵往太原
誅光弼不矜初以表示思明及封入函耿仁智盡剗去之寫表者密
告思明思明大怒執二人於庭曰汝等何得負我命斬之仁智事思
明頗久意欲活之却令召入謂之曰我在使汝向三十年今日之事
我不負汝仁智大呼曰人生固有一死須存忠節今大夫納邪說爲
反逆之計縱延旬月不如早死請速加斧鉞思明大怒亂捶殺之腦
流于地十月郭子儀領九節度圍相州安慶緒偷道求救於思明明思
明懼軍威之盛不敢進十二月蕭華以魏州歸順詔遣崔光遠督之
思明擊而拔其城光遠脫身南渡思明於魏州殺三萬人平地流血
數日卽乾元二年正月一日也思明於魏州北設壇僭稱爲大聖燕

王以周贄為行軍司馬三月引眾救相州官軍敗而引退思明召慶緒等殺之併有其眾四月僭稱大號以周贄為相以范陽為燕京九月寇汴州節度使許叔冀合於思明思明益振又陷洛陽與太尉光弼相拒思明恣行兇暴下無聊矣上元二年潛遣人反說官軍曰洛中將士皆幽朔人咸思歸魚朝恩以為然告光弼及諸節度僕固懷恩衛伯玉等可速出兵以討殘賊光弼等然之乃出師南道齊進次榆林賊委物偽遁將士等不復設備皆入城虜掠賊伏兵在北邙山下因大下士卒咸弃甲奔散魚朝恩衛伯玉退保陝州光弼懷恩奔河陽城退居聞喜步兵散死者數千人軍資器械盡為賊所有河陽懷州盡陷於賊思明至陝州為官軍所拒於姜子坂戰不利退歸永寧築三角城約一月內畢以貯軍糧朝義築城畢未浞思明至詎之對曰緣兵士疲乏斃歎耳又怒曰汝惜部下兵違我處分令隨身數十人立馬看泥斯須而畢又曰待叔陝州斬却此賊朝義大懼思明居驛朝義在店中思明令腹心曹將軍摠中軍兵嚴衛朝義將駱悅

并許叔冀男季常等言王上欲害王悅與王死無日矣因言廢興之事古來有之欲喚取曹將軍舉大事可乎朝義迴面不應悅曰若不應悅等即歸李家王亦不全矣朝義然之令許季常命曹將軍至悅等告之不敢拒其夜思明夢而驚悟據牀惆悵每好齊人寢食置左右以其殘忍皆恨之及此問其故曰吾向夢見水中沙上羣鹿渡水而至鹿死水乾言畢如廁伶人相謂曰鹿者祿也水者命也胡祿命俱盡矣駱悅入問思明所在未及對殺數人因指在廁思明覺變踰牆出至馬槽鞞馬騎之悅等至今憐人周子俊射中其臂落馬曰是何事悅等告以懷王思明日我朝來語錯今有此事然汝殺我大疾何不待我叔長安終事不成矣因急呼懷王者三曰莫殺我却罵曹將軍曰這胡誤我這胡誤我悅遂令心腹擒思明赴柳泉驛曰事已成矣朝義曰莫驚聖人否莫損聖人否悅曰無有時周贄許叔冀統後軍在福昌朝義令許季常往告之贄聞驚欲仰倒朝義領兵迴贄等來迎因殺贄思明至柳泉驛縊殺之朝義便僭為位朝義思明孽

子也寬厚人附之使人往范陽殺偽太子朝英等偽留守張通儒覺之戰於城中數日死者數千人始斬之時洛陽四面數百里人相食州縣為墟諸節度使皆祿山舊將與思明等夷朝義徵召不至寶應元年十月遣元帥雍王領河東朔方諸節度迴紇兵馬赴陝僕固懷恩與迴紇左殿為先鋒魚朝恩郭英義為後殿自澠池入李抱玉自河陽入副元帥李光弼自陳留入雍王留陝州二十九日與朝義戰于邛山之下逆賊敗績走渡河斬首萬六千生擒四千六百降三萬二千人器械不可勝數朝義走投汴州汴州偽將張獻誠拒之乃渡河北投幽州二年正月賊偽范陽節度李懷仙於莫州生擒之送款來降梟首至闕下又以偽官以城降者恒州刺史成德申節度張忠志為禮部尚書餘如故趙州刺史盧淑定州程元勝徐州劉如伶相州節度薛嵩幽州李懷仙鄭州田承嗣並加封爵領舊職思明乾元二年僭號至朝義寶應元年滅凡四年

唐書列傳卷第一百五十上

唐書列傳卷第一百五十下

劉 昫 等修

聞人詮校刻沈相同校

朱泚

黃巢

秦宗權

朱泚幽州昌平人曾祖利贊善大夫贈禮部尚書祖思明太子洗馬贈太子太師父懷珪天寶初事范陽節度使裴寬為衙前對授折衝將軍及安祿山史思明叛累為管兵將寶應中李懷仙歸順奏為節州刺史平盧軍留後柳城軍使大曆元年卒累贈左僕射祖父之贈皆以泚故也泚以父資從軍幼壯偉腰帶十圍騎射武藝亦不出人外若寬和中頗殘忍然輕財好施每征戰所得賞物輒分與麾下將士以是為衆所推故得濟其兇謀初隸李懷仙為部將改經略副使朱希彩既殺李懷仙自為節度以泚宗姓甚委信之希彩為政苛酷人不堪命大曆七年秋希彩為其下所殺倉卒之際未有所從泚營在城北第滔主衙內兵亦得衆心滔變詐多端潛使百餘人於衆中

大言曰節度使非城北朱副使莫可衆既無從因共推泚泚遂權知
留後遣使奉表京師十月拜檢校左散騎常侍兼御史中丞幽州盧
龍節度等使幽州長史兼御史大夫其年泚上表令弟滔率兵二千
五百人赴京西防秋代宗嘉之手詔褒美九年就加檢校戶部尚書
賜實封百戶幽州及河北諸鎮自天寶末便爲逆亂之地李懷仙朱
希彩與連境三節度名雖向順未嘗朝謁至是泚率先上表請自領
步騎三千人入覲詔修甲第以待之九月泚至京師代宗御內殿引
見賜御馬兩匹戰馬十匹金銀錦綵甚厚又以噐物十牀馬四十四
緇二萬匹衣一千七百襲賜其將士宴犒之盛近時未有泚又上表
請留京師從之因授其弟滔兼御史大夫幽州節度留後仍以河陽
永平軍防秋兵郭子儀統之決勝軍楊馱兵李抱玉統之淮西鳳翔
兵馬璘統之汴宋淄青兵俾泚統焉十一年八月加拜同平章尋令
出鎮奉天行營復賜金銀繒綵并內庫弓箭以寵之十二年加檢校
司空代李抱玉爲隴右節度使權知河西澤潞行營兵馬事德中

位加太子太師鳳翔尹實封至三百戶建中元年涇州將劉文喜阻
兵爲亂加泚四鎮北庭行軍涇原節度使與諸軍討之涇州平加泚
中書令還鎮鳳翔而以舒王讓遙領涇原節度二年加泚太尉朱滔
將反叛陰使人與泚計議以帛書內蠟丸中置髮髻間河東節度馬
燧搜獲之以聞并送帛書及所遣使泚惶懼頓首乞歸罪有司上勉
之曰千里不同謀非卿之過三年四月以張鎰代泚爲鳳翔隴右節
度留後留泚京師加實封至一千戶與一子正真官其幽州盧龍節
度太尉中書令並如故四年十月涇原兵叛鑾駕幸奉天叛卒等以
泚嘗統涇州知其失權廢居怏怏思亂羣寇無帥幸泚政寬乃相與
謀曰朱太尉久囚空宅若迎而爲主事必濟矣姚令言乃率百餘騎迎
泚於晉昌里第泚乘馬擁從北向燭炬星羅觀者萬計入居含元殿
明日移處白華殿但稱大尉朝官有謁泚者悉勸奉迎鑾駕旣不合
泚意比日遂巡而退源休至遂屏人移時言動悖逆又盛陳成敗稱述
符命勸其僭僞泚甚悅之又李忠臣張光晟繼至咸以官閑積憤樂

於禍亂鳳翔涇原大將張廷芝段誠諫以潰卒三千餘自裴城而至賊泚自謂衆望所集僭竊之心自此而定乃以源休爲京兆尹判度支李忠臣爲皇城使段秀實久失兵柄故推心委之遂發統師三千言奉迎乘輿實陰有逆謀秀實與劉海賓謀誅泚且虞叛卒之震驚法駕乃潛爲賊符追所發兵至六日兵及絡繹而迴因與海賓同入見泚爲陳逆順之理而海賓於靴中取匕首爲其所覺遂不得前秀實知不可以義動遠奪源休象笏挺而擊泚仍大呼曰反虜萬段泚舉臂衛首秀實格拉之恟恟然李忠臣馳助泚泚素多力絕破其面逆徒譟集秀實海賓遂併見害明日聲言以親王權主社稷士庶競往觀之八日源休姚令言李忠臣張光晟等八人導泚自白華入宣政殿潛卽僞位自稱大秦皇帝號應天元年愚智莫不憤心侍衛皆卒伍行列不過十餘人下僞詔曰幽囚之中神器自至豈朕薄德所能經營彭偃之詞也僞署姚令言爲侍中李忠臣爲司空兼侍中源休爲中書侍郎平章事判度支蔣鎮爲吏部侍郎樊系爲禮部侍郎

禮儀使許季常爲京兆尹洪經綸爲太常少卿彭偃爲中書舍人裴揆崔幼貞爲給事中崔莫爲御史中丞張光晟仇敬忠敬釭張寶何望之段誠諫張庭芝杜如江爲節度使仍以其兄子遂爲太子遥封弟滔爲翼王太尉尚書令尋又號皇太弟十月泚自領兵侵逼奉天竊威儀輦輅闖溢道途蟻聚之衆軍勢頗盛以姚令言爲元帥張光晟爲副以李忠臣爲京兆尹皇城留守居中書省尋以蔣鎮爲門下侍郎李子平爲諫議大夫兼平章事泚軍合於城下渾瑊韓遊瓌禦之泚衆大敗死者萬計泚收軍於奉天東三里下營大修攻具明日泚又分兵營於乾陵下瞰城內大震十一月三日杜希全與泚衆戰於漠谷官軍不利自是泚益驕大王師乘城而戰人百其勇賊多敗泚或出野戰官軍又獲利焉泚乃大驅百姓填塹夜攻城城中設奇以應之賊乃退縮西明寺僧法堅有巧思爲泚造雲梯十五日辰時梯臨城東北隅城內震駭渾瑊使侯仲莊設大坑爲地道陷之又縱火焚其梯東風起吹我軍衆頗危俄而風迴吹賊軍城益薪潑油萬

鼓齊震風吹俱熾須臾雲梯與兇黨同為灰燼城中三門悉出兵王師又捷其夜兵復出攻泚衆敗績李懷光以五萬人來援自河北至此衆惶駭因而大潰長圍遂解焉衆麻以懷光三日不至城則危矣三十日夜泚走至京城時姚令言於城中遣戰格拋樓每坊團結人心大異泚自奉天迴乃悉令去之曰攻戰吾自有計前此每三五日卽使人僞自城外來周走號令曰奉天已破百姓聞之莫不飲泣道路聞寂時有入臺省吏人不過十數輩郎官六七人而亦令依常年舉選初有數十人陳狀旬日亦皆屏退泚自號其宅曰潛龍宮悉移內庫珍貨瓌寶以實之識者曰易稱潛龍勿用此敗徵也無幾百姓剽奪其珍寶泚不能禁止明年正月一日泚改僞國號曰漢稱天皇元年二月李懷光旣圖叛逆遣使與泚通和鑿駕幸梁洋自此衣冠之潛匿者出授僞官十七人焉懷光初與泚往復通好甚密以錢穀金帛互相饋遺泚與書事之如兄約云削平關中當割據山河永爲鄰國及懷光失計背叛逼乘輿遷幸泚乃下僞詔書待懷光以臣禮

仍徵兵馬懷光旣爲所賣慙怒憤耻遂領衆遁歸河中三月李晟駱元光尚可孤之衆悉於城東累敗泚衆四月泚使韓旻宋歸朝張庭芝等寇武功渾瑊以衆及吐蕃誦莽羅大敗歸朝殺逆黨萬餘人於武亭川五月泚又使仇敬忠寇藍田尚可孤擊之大破泚衆擒敬忠斬之李晟駱元光尚可孤遂悉師齊進晟屯光泰門逆徒拒官軍王師累捷二十八日官軍入苑收復京師逆黨大潰泚與姚令言張庭芝源休李子平朱遂以數千人西走其餘黨或奔竄或來降泚衆緣路潰散乃奔涇州纔百餘騎田希鑒閉門登埤泚令謂鑒曰我與爾節度何故皆背恩希鑒乃使人自城上擲泚所送旌節於外續又投火焚之泚遂過敷里息於逆旅泚將梁庭芬入涇州說田希鑒曰公比日殺馮河清皆叛今雖歸順國家必不能久容公他日不免受禍何如開門納朱公與共成大事希鑒以爲然庭芬乃追及泚言之泚大悅使庭芬却社涇州庭芬請授已尚書平章事泚不從梁庭芬旣求宰相不得不復往涇州從泚至寧州彭原縣西城屯復與泚心腹朱

惟孝共射此走墜故窖中此左右韓旻薛綸高幽岳武震朱進卿
希芝共斬此使宋膺傳首以獻此死時年四十三姚令言投涇州
源休李子平走鳳翔尋並斬獲宋歸朝之敗武功降於李懷光送興
元斬之唯不獲宋遂傳爲野人所殺或云與此壻僞金吾將軍馬悅
潛走党項部落數月得達幽州此之僭逆宦豎朱重曜頗親密用事
此每呼之爲兄時賊中以臘月大雨僞星官謂此曰當以宗中年長
者攘其災變此乃毒殺重曜而以王禮葬焉及京師平亦出其屍而
斬之姚令言自有傳

黃巢曹州冤句人本以販鹽爲事乾符中仍歲凶荒人飢爲盜河南
尤甚初里人王仙芝尚君長聚盜起於濮陽攻剽城邑陷曹濮及鄆
州先有謠言云金色蝦蟆爭努眼翻却曹州天下反及仙芝盜起時
議畏之左金吾衛上將軍齊克讓爲兗州節度使以本軍討仙芝仙
芝懼引衆歷陳許襄鄧無少長皆虜之衆號三十萬三年七月陷江
陵十月又遣將徐君苜陷洪州時仙芝表請符節不允以神策統軍

使宋威爲荆南節度招討使中使楊復光爲監軍復光遣判官吳彦
宏諭以朝廷釋罪別加官爵仙芝乃令尚君長蔡溫球楚彥威相次
詣闕請罪且求恩命時宋威害復光之功並擒送闕勅於徇春嶺斬
之賊怒悉精銳擊官軍威軍大敗復光收其餘衆以紘之朝廷以王
鐸代爲招討五年八月收復亳州斬仙芝首獻於闕下先是君長弟
讓以兄奉使見誅率部衆入嵯岬山黃巢黃揆昆仲八人率盜數千
依讓月餘衆至數萬陷汝州虜刺史王鏐又掠關東官軍加討屢爲
所敗其衆十餘萬尚讓乃與羣盜推巢爲王號衝天大將軍仍署官
屬藩鎮不能制時天下承平日久人不知兵僖宗以幼主臨朝號令
出於臣下南衙北司迭相矛盾以至九流濁亂時多朋黨小人諛勝
君子道消賢豪忌憤退之草澤旣一朝有變天下離心巢之起也人
士從而附之或巢馳檄四方章奏論列皆指目朝政之弊蓋士不逞
者之辭也巢徒黨旣盛與仙芝爲形援及仙芝殺東攻亳州不下乃
襲破沂州據之仙芝之餘黨悉附焉時王鐸雖銜招討之權緩于攻取

時高駢鎮淮南表請招討賊許之議加都統巢乃渡淮偽降于駢駢遣將張璘率兵受降于天長鎮巢擒璘殺之因虜其衆尋南陷湖湘遂據交廣託越州觀察使崔瑒奏乞天平軍節度朝議不允又乞除官時宰臣鄭畋與樞密使楊復恭奏欲請授同正真軍將盧攜駁其議請授率府率如其不受請以高駢討之及巢見詔大詬執政又自表乞安南都護廣州節度亦不允然巢以士衆烏合欲據南海之地永爲窠穴坐邀朝命是歲自春及夏其衆大疫死者十三四衆勸請北歸以圖大利巢不得已廣明元年北踰五嶺犯湖湘江浙進逼廣陵高駢閉門自固所過鎮戍望風降賊九月渡淮十一月十七日陷洛陽留守劉允章率分司官迎之繼攻陝虢逼潼關陷華州留將奮鈴守之河中節度使李都詐進表于賊朝廷以田令孜率神策博野等軍十萬守潼關時禁軍皆長安富族世籍兩軍豐給厚賜高車大馬以事權豪自少迄長不知戰陣初聞科集父子聚哭憚於出征各於兩市出直萬計傭雇負販屠沽及病坊窮人以爲戰士擲刀或

不知鐵銳復任宦官爲將帥驅以守關關之左有谷可通行人平時捉稅禁人出入謂之禁谷及賊至官軍但守潼關不防禁谷以爲谷既官禁賊無得而踰也尚讓林言率前鋒由禁谷而入夾攻潼關官軍大潰博野都徑還京師燔掠西市十二月三日僖宗夜自開遠門出趨駱谷諸王官屬相次奔命觀軍容使田令孜王若儔收合禁軍扈從四日賊至昭應金吾大將軍張直方率在京兩班迎賊灞上五日賊陷京師時巢衆累年爲盜行伍不勝其富遇窮民於路事行施遺既入春明門坊市聚觀尚讓慰曉市人曰黃王爲生靈不似李家不惜汝輩但各安家巢賊衆競投物遺人十三日賊巢僭位國號大齊年稱金統仍御樓宣赦且陳符命曰唐帝知朕起義改元廣明以文字言之唐已無天分矣唐去五口而安黃天意令黃在唐下乃黃家日月也土德生金予以金王宜改年爲金統賊搜訪舊宰相不獲以前浙東觀察使崔瑒楊希古尚讓趙章爲四相孟楷蓋洪爲左右軍中尉費傳古爲樞密使王燾爲京兆尹許建朱實劉塘爲軍庫使

朱溫張言彭攢李達爲諸衛大將軍四面遊奕使又選驍勇形體魁梧者五百人曰功臣令其甥林言爲軍使比之控鶴中和元年二月尚讓寇鳳翔鄭畋出師禦之大敗賊於龍尾坡畋乃馳檄告諭天下藩鎮四月涇原行軍唐弘夫之師屯渭北河中王重榮之師屯沙苑易定王處存之師屯渭橋鄭延拓拔思恭之師屯武功鳳翔鄭畋之師屯盩厔六月邠寧朱玫之師屯興平中武之師三千屯武功是歲諸侯勤王之師四面俱會十二月宰臣王鐸率荆襄之師自行在至鄭畋帳下小校竇孜者驍勇無敵每夜率敢死之士百人直入京師放火燔諸門斬級而還賊人悚駭時京畿百姓皆皆於山谷累年廢耕耘賊坐空城賦輸無入穀食騰踊米斗三十千官軍皆執山砮百姓鬻鬻於賊爲食人獲數十萬朝士皆往來同華或以賣餅爲業因奔於河中宰相崔沆豆盧瑑扈從不及匿之別墅所由搜索嚴急乃微行入永寧里張直方之家朝貴怙直方之豪多依之旣而或告賊云直方謀反納亡命賊攻其第直方族誅沉瑑數百人皆遇害自此賊

始酷虐族滅居人遣使傳命召故相駙馬都尉于踪於其第琮曰吾唐室大臣不可佐黃家草昧加之老疾賊怒令誅之廣德公主并賊號咷而謂曰予即天子女不宜復存可與相公俱死是日并遇害二年王處存合忠武之師敗賊將尚讓乘勝入京師賊遁去處存不爲備是夜復爲賊寇襲官軍不利賊怒坊市百姓迎王師乃下令洗城丈夫丁壯殺戮殆盡流血成渠九月賊將同州刺史朱溫降重榮十一月李克用率代北之師自夏陽渡河屯沙苑三年正月敗黃揆於沙苑進營乾坑二月賊將林言趙章尚讓率衆十萬援華州克用合河中易定忠武之師戰於梁田坡大敗賊軍俘斬數萬乘勝攻華州塹柵以環之克用騎軍在渭北令薛志勤康君立每夜突入京師燔積聚俘級而旋黃揆奔華州官軍收城四月八日克用合忠武騎將龐從遇賊於渭南決戰三捷大敗賊軍十日夜賊巢散走詰旦克用由光泰門入收京師巢賊出藍田七盤路東走關東天下兵馬都監押楊復光露布獻捷於行在陳破賊事狀曰頃者妖興霧市盜嘯叢

祠而岳牧藩侯備盜不謹謂大同之運常可容姦謂無事之秋縱其長惡賊首黃巢因得充窟穴蔓延荏苒驅我蒸黎徇其兇逆展鉏鶴以成鋒刃殺耕牛以恣燔炮魑魅晝行虺蜴反噬自南海失守湖外喪師養虎災深馴梟逆大物無不害惡靡不為犴狴貽朝市之憂瘡痍及腹心之痛遂至毒流萬姓盜汙兩京衣冠銜塗炭之悲郡邑起丘墟之嘆萬方共怒十道齊攻仗九廟之威靈殄積年之兇醜河中節度使王重榮神資壯烈天付機謀誓立功名志安家國至於屯田待敵率士當衝收百姓十萬餘家降賊黨三萬餘衆法當持重功遂晚成久稽原野之刑未快雷霆之怒自叔同輩逼近京師夕晝高照於國門遊騎俯臨於灞岸既知四隅斷絕百計奔衝如窮鳥觸籠似飛蛾赴燭鳴門節度使李克用神溥將略天付忠貞機謀與武藝皆優臣節共本心相稱殺賊無非手刃入陣率以身先可謂雄才得名飛將自統本軍南下與臣同力前驅雖在寢餐不忘寇孽今月八日遣衙隊前鋒楊守宗河中騎將白志遷橫野軍使滿存躡雲節將

丁行存朝邑鎮將康師貞忠武黃頭軍使龐從等三十都隨李克用自光泰門先入京師力摧兇寇又遣河中將劉讓王壤翼君武孫珙忠武將喬從遇鄭滑將韓從威荆南將申屠棕滄州將賈滔易定將張仲慶壽州將張行方天德將顧彥郎左神策弩手甄君楚公孫佐橫衝軍使楊守亮躡雲都將高周彝忠順都將胡真鋒州監軍毛宜伯聶弘裕等七十都繼進賊尚為堅陣來抗官軍鴈門李克用率勵驍雄整齊金革叫譟而聲將動瓦喑鳴而氣欲吞沙寬列戈矛密張羅網於是麾軍背擊分騎橫衝日明而劔躍飛輪風急而旗開走電使賊如浪便可塞流使賊如山亦須折角蹂踐則橫尸入地騰凌則積血成塵不煩卽墨之牛若駕昆陽之象楊守宗等齊驅直入合勢夾攻從卯至申羣兇大潰自望春宮前蹙殺至昇陽殿下攻圍戈不濫揮矢無虛發其賊一時奔走南入商山徒延漏刃之生倖作飲頭之噐自收平京闕二面皆立大功若破敵摧兇李克用實居其首其餘將佐同效驅馳兼臣所部領萬餘人數歲櫛風沐雨旣茲平盪並

錄以聞五月巢賊先鋒將孟楷攻蔡州節度使秦宗權以兵逆戰爲賊所敗攻城急宗權乃稱臣於賊遂攻陳許營於澉水陳州刺史趙犖迎戰敗賊前鋒生擒孟楷斬之黃巢素寵楷悲惜之乃悉衆攻陳州營於城北五里爲宮闕之制曰八仙營於是自唐鄧許汝孟洛鄭汴曹濮徐兗數十州畢罹其毒賊圍陳郡 百日關東仍歲無耕稼人餓倚牆壁間賊俘人而食日殺數千賊有舂磨若爲巨碓數百生納人於臼碎之合骨而食其流毒若是趙犖求援於大原四年二月李克用率山西諸軍由蒲陝濟河會關東諸侯赴援陳州三月諸侯之師復集四月官軍敗賊於太康俘斬萬計拔其四壁又敗賊將黃鄴於西華拔其壁巢賊大恐收軍營於故陽里官軍進攻之五月大雨震雷平地水深三尺壞賊壘賊自離散復聚於尉氏逼中牟翌日營汴水北是日復大雨震電溝塍漲流賊分寇汴州李克用自鄭州引軍襲擊大敗之獲賊將李用楊景殘衆保胙縣寬甸官軍追討賊無所保其將李讓楊霍葛從周張歸厚張歸霸各率部下降于大梁

尚讓率部下萬人歸時溥賊自相猜間相殺於營州所殘者千人中夜遁去克用追擊至齊陰而還賊散於兗鄆界黃巢入泰山徐帥時溥遣將張友與尚讓之衆掩捕之至狼虎谷巢將林言斬巢及二弟鄴揆等七人首并妻子皆送徐州是月賊平

秦宗權者許州人爲郡牙將廣明元年十月巢賊渡淮而北十一月忠武軍亂逐其帥薛能是月朝廷授別校周岌爲許帥初軍城未變宗權因調發至蔡州聞府軍亂乃闕集蔡州之兵欲赴難俄聞府主殂周岌未至巢賊充斥日寇郡城宗權乃督勵士衆登城拒守洎岌至卽令典郡事天子幸蜀姑務翦寇上蔡有勁兵萬人宗權卽與監軍楊復光同議勤王出師破賊以蔡教授之仍置節度之號中和三年巢賊走關東宗權逆戰不利因與合從爲盜巢賊旣誅宗權復熾稱帝號補署官吏遣其將秦彥亂江淮秦賢亂江南秦誥陷襄陽儒醫孟洛陝號至於長安張旺陷汝鄭盧塘攻汴州賊首皆標銳以毒所至屠殘人物燔燒郡邑西至關內東極青齊南出江淮北至

衛滑魚爛鳥散人烟斷絕荆榛蔽野賊既乏食啖人為儲軍士四出則鹽屍而從關東郡邑多被攻陷唯趙犍兄弟守陳州朱溫保汴州城門之外為賊疆場汴帥與充鄆合勢屢敗賊軍兗勢日削龍紀元年二月其愛將申叢執宗權搥折其足送於汴朱溫出師迎勞接之以禮謂之曰下官屢以天子命達於公如前年中翻然改圖與下官同力勤王則豈有今日之事乎宗權曰僕若不死公何以興天以僕霸公也略無懼色乃檻送京師昭宗御延喜樓受俘京兆尹孫揆以組練磔之徇於兩市宗權檻中引頸謂揆曰尚書明鑒宗權豈反者耶但輸忠不効耳眾大笑與妻趙氏俱斬於獨柳之下

史臣曰我唐之受命也置噐於安十年惟永百蠻嚮化萬國來王但否泰之無恒故夷險之不一三百筭祀二十帝王雖時有竊邑叛君之臣乘危徼倖之輩莫不才與兵革卽就誅夷其間沸騰大盜三發安祿山朱泚黃巢是也夫謀危社稷將害君親輟裂瀆宮未塞其罪故不作於多談也然盜之所起必有其來且無問於天時宜決之於

人事祿山母為巫者身是牙郎偶緣微立邊功遂至大加寵用摠知馬牧特委兵權愛天子之獨尊與國忠之相忌故不能以義制事以禮制心遂稱向闕之兵以期非望之福此所以為亂也朱泚家本漁陽性惟兇狡耳習聞於篡奪心本乏於忠貞既弟為亂階身留京邑小不如意別懷異圖但樂荒雞之鳴唯幸和鑿之動緣幽帥之嘗因亂得謂神器之可以徼求黃巢鬪茸微人萑蒲賤類因飢饉之歲躡王尚之蹤志在敘勳謀非遠大一旦長驅江表徑入關中見五轂之蒙塵謂寶命之在我必若玄宗採九齡之語行三令之威不然使祿山名位不高委任得所則羣黎未必陷於塗炭萬乘未必越於岷峨德宗能含垢匿瑕不佳兵尚勇不然則取李承之言不委希烈代叛不然則取公輔之諫早令朱泚就行如此則未必有涇原之亂兵未必有奉天之危急僖宗能知人疾苦惠彼困窮不然則從鄭畋之謀赦羣偷之罪如此則黃巢不必能犯順鑾御未必須省方蓋差之毫釐失之千里蛇螫不能斷腕蟻穴所以壞隄後之帝王足為殷鑒史

急秦宗權乘彼亂離肆行暴虐虔劉我郡邑僭竊我衣裳終雖滅
為害斯甚茲亦沴氣之餘也

曰天地否閉反逆亂常祿山犯闕朱泚稱皇賊巢陵突羣堅披攘
徵其所以存乎慢藏

唐書列傳卷第一百五十下



書